

ASO LUA, 25 IUNI 2019

Na nofoia e le Fofoga Fetalai le Nofoa i le itula e 9:14 i le taeao.

Tatalo.

FOFOGA FETALAI: Ou te faasilasila atu ua toe amatalia Tualumaga ma Galuega a le Fono Aoaofa Fitolafono.

Avea ia lenei avanoa ou te faatalofa atu ai ma momoli atu le faamalo i le paia o le Palemene i lau Afioga i le Palemia ma le Sui Palemia, le Kapeneta faapea foi Taitaifono ma Sui usufono mamalu o le Palemene i lenei taeao. Malo le lagimama malo le tauatai.

E faatalofa atu foi ma le agaga faaaloalo aua le galuega fitaituga i Ofisa Sili o Pulega o Matagaluega ma Faalapotopotoga a le Malo aemaise foi o le faafogafoga tapuai mai a Samoa.

**TULAFONO TAU FAAOFI O LE FAATATAUINA O TUPE
FAAOPOPO (NU.2) 2018/2019 & TULAFONO TAU FAAOFI O LE
FAATATAUINA O TUPE 2019/2020
– felafolafoga faaauau i luga o le faitauga faalua – Aso 6**

FOFOGA FETALAI: E tolopo Galuega a le Fono Aoaofa o lo o saunoa le Afioga i le Minisita mo Pisinisi, Alamanuia ma Leipa. Ma lou faaaloalo ou te tapa lau Afioga e tulai mai e faaauau lau saunoaga i mea sa laga e sui usufono mamalu.

Afioga Hon LAUTAFI FIO SELAFI PURCELL (Minisita mo Pisinisi, Alamanuia ma Leipa): Lau Afioga i le Fofoga Fetalai, o lea ua maea ona e ave le faamua i lenei taeao ma sii foi le tatou viiga i le Atua i Lona alofa mutimutivale, i le tuanai atu o le pogisa ae fotuai mai malama o lenei taeao, susulu matagofie mai le la ma sulugia ai Samoa. O foliga vaaia ia o le alofa o le Atua ia Samoa atoa. E viia ai pea le Atua i aso uma.

Lau Afioga i le Fofoga Fetalai ou te toe tulai atu, ou te faatalofa ma faatulou i le paia o le Maota nei, i le afio o lau Afioga i le Fofoga Fetalai faapea foi le Palemia, lau Afioga i le Sui Palemia, afifio o Minisita o le Kapeneta, afifio o Minisita Lagolago ae tainane lena Itu, i Taitai o Komiti faapea Sui usufono o Komiti Faa-Palemene o le tatou Palemene nei, aemaise le mamalu o sui usufono ua tatou potopoto mai i le Fonousu a le tatou Palemene i lenei taeao. Faamalo le soifua maua ma le lagi e mama.

E faatalofa atu foi i Ofisa Sili o Pulega o Matagaluega o faatasi i lenei taeao, faamalo le taumafai mai, faamalo le onosai.

25 IUNI 2019

**Tulafono Tau Faaofi o le Faatatauina o Tupe Faaopoopo (Nu.2)
2018/2019 & Tulafono Tau Faaofi o le Faatatauina o Tupe 2019/2020
– felafolafoaiga faaauau i luga o le faitauga faalua**

Lau Afioga i le Fofoga Fetalai, e maea le tatou Fono ananafi sa saunao atu le Afioga i le Palemia na te faamalamalama atili le tulaga i nisi o mataupu, o le mataupu lea sa laga mai e uiga i tofogi faatapulaa po o le minimum wage, o lena ua malamalama lena itu. O le tulaga lava ia e faatonutonu lava i le tulaga foi lea e tau o le au togiaso po o casual workers. Ou te lagona ua malamalama le tulaga lea, ae o le a ou see i nisi o mataupu foi sa laga mai e nisi o sui usufono.

O le mataupu lea sa tau oo atu i ai se faamatalaga ananafi lau Afioga, sa laga mai le tulaga lea i mea o oloa ia e faatau i faleoloa, aemaise lava faleoloa i tua, faapea e le lelei le quality ma le i ai o isi oloa, o oloa ua uma aso e tatau ona faaaogaina ai, o isi foi oloa o lo o i ai gagana e le malamalama ai tatou. O tulaga lava na, o solitulafono mea na. O lo o taumafai lava le tatou Malo ina ia maua mea o oloa ia e le o i ai ni gagana e malamalama ai le au faatau e taofi i le border, ae paga lea, o se galuega e matua faigata tele ona o le tele o le volume o oloa o lo o aumai i totonu, ae e i ai foi le aufaioloa piopio o lo o i ai, e le natia le tulaga lea, o lo o nana mai ai i totonu oloa ia. Po o le a lava le taumafai o le Malo e taofia mea ia, e sao mai lava i totonu. O le auala la e mafai ai ona tatou taofia le faatupulaia o le sao mai o oloa nei, o tatou le au faatau. Muamua, afai ua silafia aua o tatou nei e o lava i faleoloa i aso uma, a silasila ua i ai ni oloa faapea i totonu o faleoloa, logo mai le tatou Ofisa, ona fai lea i ai o ni fuafuaga, aua e le mafai e le Ofisa e oo foi i le Ofisa o le Soifua Maloloina o lo o vaaia le Tulafono lea o mea tau meaai lea e i ai i lalo mea ia o low quality, e le mafai ona latou....aso uma aso uma e o atu e asiasi. O le mea la lea, e faamoemoe ia i tatou nei e faatau, a silafia loa ua i ai ni tulaga faapea i faleoloa, ia logo mai le tatou Ofisa ona o sao lava lea i ai, e faapena foi i Savaii. O la ua i ai le tatou Ofisa i Savaii, ua i ai foi le numera e vili mai i ai ona o atu lea o le Ofisa e siaki faleoloa nei.

O lona lua, o tatou faleoloa ia e o atu i ai kiliva nei faatau, aua le faatauina mea nei, aua le naunau faapea e taugofie ae silasila o lea e faatau e outou i le atunuu, o le matafaioi a outou o le faatau o oloa lelei i le atunuu. Its your responsibility to sell goods that are of quality to the buyer, nai tagata ia o le tatou pitonuu, o tagata na o lea o le a avatu i ai oloa nei faaletonu pe afai e faifaipea. Atonu a fai loa mea na, ona taofi ai loa lea o le toe o atu o tagata nei faatau atu lava oloa nei e faapea mai sui, o oloa e le o i ai ni gagana e malamalama ai tatou, po o oloa ua expire. O isi foi oloa e aumai lava i totonu o le atunuu o la e lava le taimi, ae uma lava le taimi lea e le o faatau e nisi, a o lea e aliali mai o lea lava e o atu tagata ave i tua, ia o tagata faatau la latou te logoina le tatou ofisa, o le faleoloa lea o ai lea e faatau mai ai oloa nei ua expire, ona fai loa lea i ai o le fuafuaga.

O lea foi ua ave lau faatonuga i le Matagaluega, se i silasila ane i se Tulafono e faasa ai ona toe o atu taavale e ave oloa nei e tufa solo ae leai se igoa o le kamupani e ana oloa nei i totonu i le tino o le taavale, ma i ai ni tusi risiti e iloa ai o latou nei lea na faatau oloa i tagata faatau oloa, ona mafai lea e le Matagaluega ona o sao lava i ai i le kamupani lea po o Apia, aua o le tele o isi mea ta te vaai i ai o vans papae foi ia e feoai solo.

25 IUNI 2019

**Tulafono Tau Faaofi o le Faatatauina o Tupe Faaopoopo (Nu.2)
2018/2019 & Tulafono Tau Faaofi o le Faatatauina o Tupe 2019/2020
– felafolafaiga faaauau i luga o le faitauga faalua**

E feoai atu lava ma tufa, e leai ma se igoa e le iloa foi po o ai ia kamupani, e fesili foi i faatauolua ae fai mai, o nai Saina a ia o lea e taugofie mea ia e aumai, ae tatou te tilotilo foi i le lelei lautele o le tatou atunuu. O auala ia e tau puipui ai le soifua maloloina, aemaise foi o le atili fai ai o nei auala solitulafono e i latou e ana oloa.

Ia, o le talosaga foi i a outou Afioga i sui usufono, a outou o atu i tua i outou itumalo, a o i ai ni mea faapea o tupu, talanoa i ai i faatauolua, tau mai po o ai i latou nei e faia mea, o le solitulafono le mea la e fai. Atonu o i ina e faalogo ai faatauolua nei aua o a outou Afioga lea e feagai ma mea faapenei, e tatau pea ona tatou galulue faatasi. Aua le faapea mai o le Matagaluega o Leipa ma le Matagaluega o le Soifua Maloloina, o le Matagaluega o Tupe Maua e ana lea matata ma lea matata. O lea foi ua o lava le Matagaluega o Leipa ia auau faatasi ma le Matagaluega o le Soifua Maloloina, e sue mea ia e le tatau ona faatauina. Ia, o le talosaga atu lena i lena mataupu leaga o lea na faaali mai.

Lau Afioga sa laga foi ni oloa e faapea ua fai lava si taugata, mea ia o taavale ma mea o masini faaonaponei. Mo le silafia o na lava foi oloa e le i lalo o le price control a tatou, e pei o lo o alu lava latou i tau e talafeagai i le latou fuafuaga. Ae afai foi ua aafia ni finagalo e pei lava ua soona fai mea a le au vaega lea, e mafai lava foi e le tatou Matagaluega lea ona intervene i le vaega lea, aua o lea foi ua i ai le tatou Komiti foi lea o le Consumer Protection and Competition Committee e mafai ona silasila po o i ai ni auala le talafeagai ma le Tulafono o Mea tau Fefaatauaiga o fai e latou nei. O le mea foi lea o le auau faatasi po o le collusion o i latou nei e faatauina oloa nei, ona seti lava lea o le latou tau i le mea e gata ai ia i latou uma lava, ona le aoga ai lea o le tatou Tulafono lea o le fai faatauvaga. Ae pei lava ona fai atu, afai lava ua lagona e le mamalu o le atunuu o lo o faatauina ua fai lava si taugata, ua fai foi si le fetau pe a fuafua atu i ai i tausaga o le taavale po o tulaga faapena, logo mai le tatou ofisa e mafai lava ona fai se fuafuaga i ai ma oo atu foi i ai, ia sailiili lelei mai pe faapefea ona maua lena tau tele faapea. O le taumafaiga lava ina ia fair le trade, le faatau ma le faatauina mai le oloa. O tulaga na e i ai lava le avanoa e fesoasoani atu ai le tatou Matagaluega i le au faatau pe a oo i se tulaga ua afaina finagalo ona o le soona sii o tau o oloa.

Sa laga mai e nisi o sui usufono le tatou Matagaluega o Fale, le Housing Corp, e faapea o le tulaga i nonogatupe, ioe. A silasila i ai, tasi lena Matagaluega ua tele lona aoga ia Samoa, aemaise lava latou e le gafatia ona faatupeina ni fale taugata. Silasila i ai ua tele a le tupe ua alu ia i latou nei e manaomia le fesoasoani e fai ai se fale, faalelei ai se fale, faatele ai se fale. O lea ua tatou silasila i le tele o pitonuu o Samoa, ua manaia lava fale ma maota. O le tele o nisi o na fale ma maota na maua atu i i le fesoasoani. E i ai le scheme lea sa saunoa i ai le sui usufono e \$20,000 le tapulaa, e leai la ni aseta foi nei e guarantee ai, na pau lava le mea o le i ai o se tagata e guarantee, se tagata faigaluega. O le naunautaiga ina ia i ai le avanoa tele e toe maua mai ai le tupe a lo tatou Malo. E avatu le tupe, ae i ai le faamoemoega e toe maua mai.

25 IUNI 2019

**Tulafono Tau Faaofi o le Faatatauina o Tupe Faaopoopo (Nu.2)
2018/2019 & Tulafono Tau Faaofi o le Faatatauina o Tupe 2019/2020
– felafolafoaiga faaauau i luga o le faitauga faalua**

Ae manino lava aiaiga o le Tulafono, e malamalama foi le o lo o sau e nono atu le tupe i le taimi e tatau ona totogi ai, e fia foi le peimeni ona faapena lea. O mea masani lava, a e alu foi i isi faletupe, o le mea lava lena, e le faapea e ese le Tulafono o fai e le tatou Matagaluega o Fale. Pau lava le mea e tauva a mea o pasene po o ai e maualalo le tului, a o tulaga ia, o lo o solosolo lelei lava le scheme lea, ma e laitiiti lava se tupe o lo o nofo aitalafu ai tagata i lalo o le scheme lea, e tusa ma le 3% o le \$30miliona lea e faaagaaga mo le scheme lea. Tusa la o le 3%, o se mea o le \$90,000 lea e nofo aitalafu ai tagata.

O le mea la o lo o tau mai i ina, o lo o toaaga lava le toatele o tagata, o lo o tausisi i Tulafono ma aiaiga na fai. O isi tagata e lelei lava i le taimi o lea e sau ai talosaga, aoi se tupe se i fai ai se fale. E mamulu atu loa le tupe ona amata foi lea ona faapeapea foi lea, e gata lava i masina muamua ona lelei, ia ona amata loa lea ona tulituli. O le Matagaluega lava foi o lo o tau fai lava lana galuega o le o e taumafai i aiga nei e toaaga mai, aua a leaga loa lau record, e oo mai le faavavau e le toe maua se isi avanoa. O le tagata foi e vaai puupuu, ae le vaai mamao. A lelei le faiga o lau nogatupe lea, e tele le avanoa mo isi foi nonogatupe i le lumanai, ma nonogatupe e tele atu i le \$20,000 lea. O le mea lea, o le faamaoni a le mea sili, e faamaoni atu foi le Matagaluega i le tagitagi mai, ae tatau foi ona faamoemoe e faamaoni mai i latou o lea sa omai e nono tupe e fesoasoani i le tou mafatiaga.

FOFOGA FETALAI: Malie lau Afioga i le Minisita se i tulai mai le sui usufono o le Aiga Malosi i Safata Sisifo.

Afioga Leaana Ronnie Posini (Safata Sisifo): Lau Afioga i le Fofoga Fetalai, faafetai tele lava i lau Afioga i le Minisita mo le folasaga malamalama a lau Afioga. E pei o au lea sa ou laga le mataupu lea lau Afioga, ona e pei sa ou taua foi lea i le tulaga o le \$20,000 lea e te loan ai, a e totogiina i le lima tausaga ona faaopoopo lea i ai o le \$11,000 pei ona faapuupuu ma faafaigofie atu i lau Afioga. Ae afai e tolu tausaga ae mafai ona totogia atoa le tupe lea, pe ua lava le \$7,000 lea ta te totogia nai lo le \$11,000 lea pe afai e totogi atoa i le tulaga foi lea, aua pe tolu a tausaga, e totogi a le \$11,000 lea e faaopoopo i ai.

O le talosaga lea lau Afioga, pe leai ni nai fetuunaiga laiti pe afai e vave ona totogi atoa le nogatupe lea. Ae faafetai tele i lau Afioga, lea e matau atu e laitiiti lava le pasene lea mo le tagata e le faamaoni i le totogiina o a latou aitalafu. Ou te talitonu la, o lea la e ola le tatou faalapotopotoga. Ma le agaga faaalalo.

FOFOGA FETALAI: Se i tulai mai le Minisita o Tupe.

25 IUNI 2019

**Tulafono Tau Faaofi o le Faatatauina o Tupe Faaopoopo (Nu.2)
2018/2019 & Tulafono Tau Faaofi o le Faatatauina o Tupe 2019/2020
– felafolafoaiga faaauau i luga o le faitauga faalua**

Afioga Hon Sili Epa Tuioti (Minisita o Tupe): Faafetai i lau Afioga i le Fofoga Fetalai mo le avanoa. O sina fesoasoani atu foi i le tulaga lea ua taua tulaga ia o le faigata ona totogi aitalafu ia, e le gata i le Housing Corporation, ae sa laga foi i le saunoaga a nisi o sui usufono le tulaga foi lea i le tatou Finance Companies ma le vaega foi lea o le SPPD, ona o le tulaga foi lea ua maualuluga tele tului. Ua uma ona faatalanoaina ma le Faletupe tutotonu, o le a amata nei ona fai i ai se toe suesuega i le tulaga lea faapea o le tele e tatau ona 8% i le tausaga, a o le mea la e i ai pei e foliga mai ua 8% i le masina. O le tulaga foi lea e tatau ona toe tilotilo i ai leaga e le o i totonu o le tulaga foi lea o le regulatory role a le Central Bank ona e le faaaogaina e i latou ni deposits, o latou tupe ia e nono mai le NPF ma isi, ona o lea toe nono atu i tua i le toatele o lo tatou atunuu. Ua tele foi le faitio mai, ma o lea la o le a i ai le tulaga, masalo o le isi tatou Fono ua faataatia mai se Tulafono ina ia puipuia ai le mamalu o le atunuu i le tulaga lea o le soona fai o tului. Ma o le toatele foi o nisi o i latou lea e nono mai tupe i finance companies ia, o le toatele foi o i latou ua i le falepuipui ona o tulaga lena, faapea ua le mafai ona totogi, ae ua tatau ona toe faatulaga lelei. Ia atonu foi pei ona saunoa le Afioga i le Minisita i le \$20,000 lea o le tupe maualuga lea e tatau ona nono mai le tatou Housing Corporation, masalo o le taimi foi lenei o lo o toe tagatagai i ai le Ofisa o Tupe faapea le Faletupe Tutotonu i se fesoasoani e mafai ai ona toe maua se isi vaegatupe e fesoasoani ai i le Housing Corporation, ina ia mafai ona tali atu i manaoga o le tatou atunuu i le toe faaleleia lea o fale o lo o nonofo ai, aemaise foi i le taimi pe a uma ni afa ma tulaga faapena, e toe faaleleia ai fale foi o tatou i se tulaga foi lele i le malamalamaga o lo o fausia nei fale i luga o tatou customary lands. Masalo o le amataga lena o fale e fausia i totonu o aiga i luga o fanua ia faaleaganuu, ae tatau lava ona toe tilotilo i se tulaga foi lele aua ua toatele foi nisi o aiga o lo o manaomia se tupe e fai ai fale i luga o fanua ia ua faamatuu atu i ai, ua tatau ona toe vaavaai i ai le Ofisa o Tupe ma le Faletupe o le Central Bank, ona fai ai lea o se fautuaga i le Kapeneta ina ia toe faafaigofie ai ona maua tupe ia ma fesoasoani foi e faamualalo le tului.

O le fesoasoani atu lea i le Afioga i le Minisita.

FOFOGA FETALAI: Malo faafetai. Ia se i tulai mai le Minisita mo Pisinisi, Alamanuia ma Leipa.

Afioga Hon LAUTAFI FIO SELAFI PURCELL: Faafetai atu i le Afioga i le Minisita ua faamalamalama atili le tulaga lea. Ae afai o i ai se fuafuaga e toe maua nisi tupe a le Matagaluega lenei o Fale, o oe lava o le toa. E manaomia lava le toe maua o nisi seleni e faatele atili ai le portfolio.

O le vaega lea i le \$20,000 o le scheme lava lea e ese a, is a special scheme ae ese a nonogatupe masani a le Matagaluega latou e sili atu i luga o le \$20,000. Leaga ua vave mai le tulai mai o le sui usufono mo Safata, a o lea o le a ou oo atu i ai i le tulaga tonu lea. O le tulaga lea na fai le feagaiga e 10 tausaga e totogi ai lau nogatupe, ia ae te i ua e malo i le Lotto, sau loa lea ua uma le tolu tausaga e te manao e faamotu loa. Se o le mea lelei le mea lena. O

lona uiga o le mea lena ua vave ona toe maua mai le tupe a le Matagaluega, ia e nono i nisi tagata. O le taimi la lena e te sau ai, fai le tou feutanaiga ma le Matagaluega. E leai ni mea faapea foi lea o le a tausisi o le tupe lea sa tataua ona e totogiina i le 10 tausaga, lea o le a e totogiina i le 3 tausaga. O lea e faafogafoga mai le Matagaluega, e fai lava feutanaiga ona o lea ua e sau aumai uma lau tupe. Ia mataulia foi e i ai lava mea o penalties, as long as aua ne i e sau faapea na o au payments lava ia na fai. Mataulia a e le totogia i le masina ua i ai le penalty foi lea e avatu. Le totogia i le isi masina, e le faapea la e tolu tausaga e le i totogia le loan ae sau fai mai, o lea la ua maua le tupe lea o le a pay uma ai, ae tataua lava ona totogi penalties lea na e saina ai i le taimi sa fai ai le feagaiga. E faamalamalama uma a mea na, a o le tulaga lena e fai lava le feagaiga ma le Matagaluega po o le a le tupe e tataua ona totogi. O le Matagaluega foi e naunau a ia maua mai tupe, a o le Matagaluega foi na faatu e fesoasoani i o tatou tagata. O le tulaga lena e faamalamalama atu ai i te i ua sese se faamatalaga a se isi faapea, na ou alu atu ae fai mai e tataua lava ona totogi. E leai, o lea ua ou fai atu, e i ai feutanaiga lava a le Matagaluega, fuafua lava foi i le situation lea ua i ai le tagata ma le tupe ua maua mai, le tulaga o le payment o lana loan up to that point.

Ia lau Afioga, sa laga mai foi e le sui usufono tatou tagata foi nei e o i fafo e pei o le au kamuta lea ua maua nei avanoa matagofie. Ma i le taimi mulimuli sa ou malaga atu ai foi i Niu Sila i le amataga o le tausaga lena ma matou feiloai ma le vaega lena....

FOFOGA FETALAI: Oi, e le i uma? Ia ai a e le i manino. Ia, tuu atu la le avanoa le avanoa mulimuli lea.

Afioga Leana Ronnie Posini: Faafetai lava i lau Afioga i le Minisita. E pei o lea ua e saunoa manino i le tulaga lea. Faafetai tele lava. E pei e ese foi le matou fesootaiga ma le Matagaluega, a o lea ua saunoa manino lau Afioga, ou te talitonu la o le a totogi motu loa isi aitalafu lea e i ai ona faamama lea o le tului lea ua e saunoa i ai. Ma le agaga faaaloalo.

FOFOGA FETALAI: Malo.

Afioga Hon LAUTAFI FIO SELAFI PURCELL: Ia faafetai. O le mea taua a o le totogi mai o aitalafu i le tatou Matagaluega. Ae pei ona ou fai atu, se o mea lava a tatou e fai i lalo nei, a lelei lava foi le faatalanoaga o le Matagaluega ona maua atu foi lea o le fesoasoani ma le faamalamalaga atili o le mataupu. E pei o le mea taua lena.

Lau Afioga i le Fofoga Fetalai, o lea sa taua....

FOFOGA FETALAI: Ia se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui (Palemia): Lau Afioga i le Fofoga Fetalai, e taua tele le mataupu lea ua laga ona se ua ta fiu e faafeagai ma tagata e o atu ia te au. A o lea ua faamalamalama atu, o le mea lea i le va lava o le tagata ia na nono tupe ma le faletupe. Mo sina faataitaiga o le faletupe o le National Bank po o le DBS po o le faletupe lea o le ANZ. O mea na e te agai a oe e talatalanoa malie i le Pule, fai ai le lua fetuunaiga, ae leai sau feau i ai. O le tele a la o taimi a o atu tagata, ona fai a lea o lau tusi. O lau

foi tusi, o le tusi faaoololomaau ma lou iloa masalo pe 50% le talia ma le le ono talia. Aua e ala lava ona fai o le faamalie o le tagata e alu atu ia te au, a o le mea ia, o le mea lava ia i le va o le tagata na aitalafu ma le e ana le tupe i luga o le va lelei. Ia ou te le tau tau atu, o isi e matua o a tootutuli i luma o le... ia aua o mea e fai i totonu na o oulua a. A lelei a au upu, e vave foi ona malie. A e alu atu foi lele, aemaise a la pe a sau ia te au, ona alu atu loa lea ma lau tusi, fai mai le Palemia e fai le mea lea. Ae le o se mea lea na ou fai atu ai. O le mea lea e tusi atu ai, se i faamolemole alofa ane i le uso ua sulufai mai ua leai se faamoemoe, e leai foi sau aia i la outou galuega, ae se i e tilotilo ane i ona mata ma e alofa ane i ai, e le o sau client o le client a outou. A lelei ona e faia lenei client, e alu atu foi fai le talaiga lelei mo le tou faletupe. O le mea lenei, se o le between lava, o lou poto a e teu le between e maua ai faamanuiaga. Ae a e alu atu i luga ona o le tusi lea na e sulufai mai ai ia te au, e leai lava ma sau mea e maua, na o le fuamoa le mea e maua. O le mea lenei o lea e tupu soo i le toatele lea e sulufai mai ia te au, e piopio piopio e totogi nogatupe i le Faletupe o Atinae, ona omai loa lea ia te au. O lea foi la ou te tusi atu i lou iloa o la e i ai le power i o e teena ai, e le talia ai le fautuaga a au. Aua o tagata nei e faatinoina galuega nei, e mulimulitui i le tulaga o le faamaoni, e fai lava le latou faaiuga i le faamaoni ma le le faamaoni o le tagata. Ia o le a la le mea e mafai pe afai e te alu atu ua fia sefulu tausaga ae leai se mea o totogiina, a o lea faatoa e alu atu pe totogi foi na o nai mea, ae siaki atu e latou i o i le faletupe o le National Bank po o le ANZ, o la e up to date au payment, la e lelei lava au payment i o a o lea e te fainaelo mai i i le Faletupe o le Atinae a le Malo po ua fainaelo foi i le NPF.

Lau Afioga i le Fofoga Fetalai, o le mea lenei o lea e tupu nei, o le fainaelo mai o Faalapotopotoga i le Faletupe o Atinae a le tatou Malo, a o la e faamaoni i le totogiina o latou nogatupe i faletupe ia a faalapotopotoga i tua. Lau Afioga i le Fofoga Fetalai, e taua le mataupu lea ua aumai, a o le faaiuga a o mea uma, o oe lava lenei e tietie i ai.

Lau Afioga i le Fofoga Fetalai, o le fesoasoani atu lenei.

FOFOGA FETALAI: Malo. Ia vaai le aso pisi e le pisi ai le Ofisa e te alu e te tootuli. E faigofie lenei. Ia se i tulai mai le Afioga i le Minisita.

Afioga Hon LAUTAFI FIO SELAFI PURCELL: Faafetai i le Afioga i le Palemia mo le toe faamalamalama atili. O le mea moni a lenei o lea e tupu, ou te faamoi foi i le saunoaga. O le mataupu i totogi o tatou au kamuta o lo o ave i fafo, pe ua 26 ea le aofai o kamuta ia ua ave i lalo o le scheme lea. E pei lava o le seasonal workers, e 3 tausaga e galulue ai i Niu Sila, lea foi e tilotilo i Ausetalia foi. Ae o se faamanuiaga e matautia le lelei. O le taimi mulimuli sa ou talanoa ai ia i latou nei, o le toafitu mulimuli lea na avatu i le taimi a o ou faimalaga atu. O la latou tala, o le faafetai i le Malo mo nei avanoa ua o latou maua.

Aua o le scheme lea e faigaluega ma aoga i le taimi e tasi. E faatele ai le tomai ina ia pei i tatou o kamuta la e faigaluega i Niu Sila. O le totogi la, ou te le iloa po o....., o lea ua ou faalogo atu faapea ua i lalo ifo o le minimum wage totogi o kamuta ia a tatou. E leai lava se mea faapena o tupu, e oo foi lava i seasonal workers e leai lava se isi o i lalo ifo i le minimum wage. O le minimum wage a Niu Sila lea e i ai e \$17.00 i le itula. O le totogi o tatou kamuta ia e i ai, manatua foi o atunuu la e eseese ia categories po o le faatulagaga o kamuta. O tatou e na o le taitai kamuta lava kamuta uma lava le

isi vaega. Na o mai lava tagata mai fafo interview lelei le aualii lea e iinei. E toatele le au kamuta sa apply, ae na omai le vaega lea mai fafo interview lelei lava tagata ia, maua ai lea.....o le vaega la lea e auauai lava. E le faapea ua pau lea o tagata. O lea lava e fuafua ia toatele ni tatou tagata e maua lenei avanoa e atiae ai o latou tomiai. E toe foi mai i le atunuu, o le mea taua lena, e toe foi mai i le atunuu pe a uma le 3 tausaga lea. E le faapea e o atu i o ma nonofo ai i le 3 tausaga. E leai, e fai lava ma omai foi e asiasi mai aiga. Ae o le toe foi mai i le atunuu e le faapea e o atu i o ona maua ai lea o ni latou nofomau i lalo o le polokalame lea. O le foi mai la, e toe faafoi mai le tomiai ia Samoa aua lona ia atinae. Ua o mai ma le tomiai maualuga, o le mea lea tatou te i ai. O le tau la o le totogi o le maintenance, ou te le iloa tonu faaupuga o nei mea, o hammer hands, o i latou foi ia e faatonu atu e alu e tuitui mea ma alu e....., E \$21.00 i le itula, o le isi vaega e i luga atu o le builder labourer e \$22.00, assistant carpenter e \$23.00 i le itula ma le carpenter e \$24.00 i le \$25.00 i le itula, o totogi na ae o lea faatoa o atu e le i atoa se tausaga i o o le isi vaega fou lea. Atonu la o le totogi e taua, ae ia te au ia, o le tomiai ma le avanoa e aoaoina ai ma atiae ai o latou tomiai o le mea taua atu lena. Pe a tilotilo mamao, pe a tilotilo i le ata aotelega, the bigger picture e omai ma latou, ona aumai lea o le manuia mo Samoa. O i ina e maua ai ni o latou tau i ni totogi o le a latou maua.

FOFOGA FETALAI: Malie lau Afioga i le Minisita ua tulai mai le faauilavea a le sui usufono mo Siumu. Tulai mai le sui mamalu

Afioga Faalogo Sopi Iosefa (Siumu): Faafetai. Faafetai i le Afioga i le Minisita mo le faamalamalaga o le mataupu lea, leaga o au sa lagaina le mataupu lea. E na o si faafesili lava, o lo o taua le totogi po o **NZ\$?** O lo o taua mai o \$?

FOFOGA FETALAI: Tulai mai le Minisita.

Afioga Hon LAUTAFI FIO SELAFI PURCELL: E le faigaluega i Niu Sila a e \$ Samoa. O NZ\$ ia ou te talanoa atu ai. O le minimum wage a Niu Sila lea ou te tau atua, e \$17.70 o le NZ\$. O mea uma foi ia na ou talanoa atu ai, o NZ\$ lea e totogi ai o tatou tagata ia. Ou te le iloa, te i ua i ai foi ni manatu faalatuua ua nofo ma fai mai a mea.....aua o le mea lava lea o lea tatou te vaai i ai. E fiu lava e fai mea ia lelei i lo tatou atunuu ma fiefia i latou la e o, ae i ai lava tagata e nonofo ma fai mai, ua exploit o tatou tagata, ua exploit o tatouO le mea silisili lava lea ou te faa.....faapea foi le Afioga i le Palemia, e faamalosiava lava i le maualuga e gata ai le maualuga o Niu Sila ma Ausetalia ia Minisita. O lea ou te talanoa atu ai, e le manao Samoa i se tulaga e foliga mai ua exploit o tatou tagata, ona o le tatou naunau ia maua galuega. Po o le a le tatou naunau i galuega ae o atu o tatou tagata i o ae abuse e i latou, e uma ai i ina la tatou feagaiga lena. E naunau lava ina ia o atu o tatou tagata galulue e pei lava o tagata o Niu Sila galulue e pei lava o tagata Ausetalia, maua o latou rewards e pei lava o tagatanuu o la atunuu. O le latou foi tala foi lena.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai...

FOFOGA FETALAI: Tulai mai le Afioga i le Palemia.

Susuga Hon Tuilaepa Auelua Fatialofa Lupesoliai lolofietele Neioti Aiono Galumalemana Dr. Sailele Malielegaoi: Ou te tau fesoasoani atu i le mataupu lea, masalo pe silia i le 10 tausaga talu ona laga e Samoa le tulaga o le....., e ae ina ua maea ona tutupu ia mafuie ia na malepe ai le tele o fale ma auala i Kalaisetete, ona laga ai loa lea e tatou le mataupu lenei o le fautua ia Niu Sila, pe a ae malilie, e faaopoopo atu i luga o galuega ia o le tau o apu ma fua o faatoaga, ia toe faaopoopo atu i ai ma le galulue o tatou tagata i isi galuega ia e i ai tomai faapitoa. E fai lava sina umi o ou laga pea i le malo o Niu Sila le tulaga lea i le faatalanoaga e fai ma o latou taitai. Ae o le isi lea auala na faatuai ai ona tali mai Niu Sila faapea foi ma Ausetalia, ona sa latou asiasia ma faatalanoa mea ia o conditions o employment. E o atu ai o tagata i fafo e galulue ai, ina ia faatumau pea le tulaga maualuga, aua ne i faaogaina e i latou o le afaifaatoaga le o atu o tagata o le Pasefika, ae totogi i totogi e maualalo ifo, nai lo le maualuga lea ua uma ona faatulafonoina e Niu Sila mo latou tagata togiaso.

Lau Afioga i le Fofoga Fetalai, o lea sa ou taua ma faamanino ananafi, e lua ituaiga tagata faigaluega, e lua foi la ituaiga totogi ia e faatulaga, e ese lava totogi o le afaigaluega tumau, ma le vaega lua e ese le faatulagaga o totogi o tagata togiaso tagata labour. O lea la e faataoto ai i ina le minimum, le maualalo e pito sili ona maualalo e soli loa e se kamupani faasala loa. O lea la e o gatasi ai tatou ma Niu Sila. E le mafai ona allow pe faataga e Niu Sila, se kamupani latou te totogia maia i o tatou tagata ni totogi e maualalo ifo na i lo le faatapulaa ua faataoto e le Malo. O le tulaga foi lena o lea sa mafua ai ona faigata ona faatalanoa le ulufale atu o tatou kamupani vaa lea o le Pacific Forum Line i le tausaga e 1973. Na amata faatalanoa se fuavaa a le Pasefika mai le 1971. Toe fai i le 1972 toe fai i le 1973, o i ina na iloa ai o le fili maoae o le taofia o mea nei o vaa e pulea e le Pasefika le PFL ona malaga atu i Niu Sila ona o le tulaga lea o totogi. Afai e alu atu le tatou vaa lea o le PFL i na ona aso, e tataua ona tutusa lelei le maualalo e totogi ai o tatou seila ma le totogi e totogi ai seila a Niu Sila, ina ia aua lava ne i pau maualalo ifo. Aua o la foi e mataitu e le afaigaluega a le sosaiete po o Iuni nei a Niu Sila tagata togiaso.

Lau Afioga i le Fofoga Fetalai, e vaivai tele manatu ia ou te vaai i ai e aumai e latou foi lele, e tafafao tafafao faalogo i tala ona aumai loa lea i nusipepa, e faaleaga ai ma taumafai e taofia ai le o o tatou tagata i Niu Sila. A o tagata ia e faitio, o tagata latou te le i faia se mea lelei mo le atunuu lenei. E na o le pau lava lea o le oloa la ia i latou, na o le faitio, faitio, faitio. Ae a suesue lo latou soifua o a latou mea na fai? E leai lava ma se mea o faia, e na o le pau lava lea o le atamai lea e i ai faitio i lea mea faitio i lea mea, ae a suesue ane lo latou olaga. E leai lava ma ni a latou mea lelei o faia mo le atunuu lenei.

FOFOGA FETALAI: Malo. Ua manino auofala e tusa ai ma lea mataupu. Tulai mai lau Afioga i le Minisita.

Afioga Hon LAUTAFI FIO SELAFI PURCELL: Faafetai i lau Afioga, atonu o lea ua matua malamalama atili le mataupu i le saunoaga a le Palemia. O le isi o mataupu sa laga mai e sui usufono mamalu, o le tulaga lea e i ai le tatou maketi lea e fuafua nei mo gatai i i..gauta i o. O fuafuaga a le Malo ua

faataatitia i le taimi nei ina ia faaoga fanua na e latalata i le taulaga. Sa i ai fuafuaga mo le maketi e fausia e Niu Sila, ae peitai ane ua i ai se fuafuaga a le Malo, ia toe faatu se fale tele i le mea lea e i ai nei le maketi lea e i gatai i i, o lo o faatau ai oloa a lo tatou atunuu. O lea la ua silasila ai le Malo i se isi mea lata ane, e fai ai le tatou maketi tele lea e o uma lava i ai le vaega lea e i gatai i i, fuafua foi, e omai ai ma le vaega la e i gauta i totonu o le maketi lea e faatau ai tatou meamata. Ona tasi ai lava lea o le maketi e o uma i ai le au faatau mo mea taulima ma laei tulaga uma lava faapena.

Atonu a silasila i ai i le taimi lenei faapea lea e fai si mamao ese, a o lea o lo o i ai fuafuaga a le Malo, e fai uma lava auala e fesootai ai le taulaga lea e i ai nei ma le maketi lea e i ai le fale o le a faia nei, ma le fale o le Malo ma le mea lea e i ai pasi, e fesootai atoa lava lea ma i ina. Ona aveva lava lea ma se fefaatauaiga o magaala, ona leai lea o le mea lea faapea leaga ua fai sina mamao. Its gonna be part and partial of the trading area le vaega lea. E o atu ai i ina pasi, o atu i le isi maketi la e i o. Atonu a maea fuafuaga ia, ia o le a tulai mai ai foi se fale e talafeagai mo lenei foi vaitaimi. E aoga foi mea ua tutupu e aoaia ai i tulaga o design o tatou fale ma mea uma faapena. Ae tuu mai lo outou faatuatuaga, o lo o taumafai lava i se mea e agai ai i luma lo tatou taulaga i Apia nei, aua foi le fuafua i le tulaga o le uafu i Vaiusu. Atonu o le a fetau lelei lava ma le mea lea o le a i ai le maketi magaala o le a sau mai o. E o mai ai turisi, ona faigofie lava lea o mea uma. Ae pei o le taimi nei ona o la e le i amataina le galuega, e ala ai ona tulai mai le tulaga lea e pei e masalosalo e sese le mea e tu ai.

O le taulaga i Salelologa le maketi i Salelologa, o la ua i ai fuafuaga a le Matagaluega o le Samoa Land. O la ua amata ona faagasolo, ina ia tulai mai le maketi lea ma ona autafa i tulaga lelei, faaoga lelei ai le laufanua ina ia maua mai ai tupe a lo tatou Malo. O lo o fai foi nei fuafuaga ae o lo o fuafua foi i le plan ina o le taulaga, e pei o le mea uma nei o lea e o faatasi i le taimi e tasi. i te i foi ua fai le isi mea ae fai atu le taulaga ia ua feteenai. Ae ua i ai le fuafuaga e faaleleia le tatou maketi i Salelologa i le taimi nei.

Lau Afioga i le Fofoga Fetalai, ona ou oo mai lea i lo tatou vaalele. E muamua lava ona avatu le faafetai. O le faalua lenei ona ou tulai atu i Fonotaga ua tea ma momoli atu lava lau faafetai, e le gata ia outou Afioga i sui usufono aemaise foi le mamalu o Samoa. Faafetai atu i lo outou lagolagosua. E leai lava se isi o tulai mai ma faapea mai o le tatou vaalele e a ma a. Ioe o manatu lelei na e aumai, tuualalo o fautuaga. E leai lava se fautuaga po o se tuualalo e talituaalimaina e le Minisita lenei, e faamaumau uma i lalo ma silasila i ai le Matagaluega ma kamupani i mea e tatau ona faatino. O manatu uma lava e fai ai lo tatou vaa fautele. Ma e momoli atu ai le faafetai i e sa laga foi nei mataupu, i lo outou manatu i le alualu i luma. E le o toe i ai lava se isi na faapea po o le a le mea na fai ai lena vaalele, ae na o le agai lava i luma i le faaleleia ia tupu pea ma tupu pea. Ia e momoli atu ai le faafetai.

O le taimi nei i le tulaga o i ai vaalele a le lalolagi, e pei ona silafia, ua faaletonu lava le environment lea ua i ai, talu ai faalavelave e lua ia na tutupu i vaalele a le Boeing le Max fleet, o i tonu lava lea na tuu e aumai ai le tatou vaa. Ia o le tatou vaa ua uma ona vali toe lava o le feosoi loa o pailate ma aumai loa i Samoa, ae tutupu loa faafitauli ia. O lea la ua toe taofia uma ai lava vaa nei a le lalolagi, 370 ea ituaiga vaa ia ua tutu nei. O lo o aafia tele ai lava isi atunuu, amuia tatou e tasi lava le vaa, a o isi atunuu... ia ma latou fogavaa, ua matua afaina lava.

O Fiti, atonu a silasila i ai i le malaevaalele i Fiti, e tolu ia latou vaalele la ua amata ona sosolo ai le fuesaina i pau. Aua foi la ua tu lava, ua ala la ona tutu, ua faasa ona toe felelei. Aisea? Ona o lo o fai nei suesuega i auala na tutupu ai faalavelave ia e lua i le ituaiga vaalele lava lea, lea na tupu i o i Malaysia ma lea na tupu i Ethiopia. O lea la ua taatia ai faapea ia fuafuaga a lo tatou Malo i le agai i luma se i mautu mai ia suesuega nei, ia ona o tatou iloa lea o le mea e tatou te agai i ai.

Ae e le o tuua ai galuega a le Matagaluega i le kamupani. O le taimi nei o lo o tilotilo po o le a se auala e maua ai se isi tatou vaalele, leaga o le vaa lea o le Millendo ia e uma nei ia Aukuso. O le pona ua le mafai ona o tatou lisiina le ituaiga vaa lea. Manaia ia o le vaa pe ana faapea e avanoa. A o lo o tatou tilotilo i se vaa e tau foliga faapea ma tau lalata faapea aua o le vaa lea e faatoa tolu tausaga. O le mea foi lena e fou ai lava ma manaia ma tele, ae o lo o tatou tilotilo i nisi avanoa e maua mai ai se tatou vaa e latalata i le mea lea e i ai nei. Ua masani foi le tatou atunuu, e leai lava se isi e sau ma fai mai o le vaa lea e faaletonu. E mananao uma lava e aumai se tatou vaa faapea. Ia o lo o taumafai lava le kamupani e maua mai se vaa e latalata i le tulaga lea. Mo le silafia foi, talu lava ona pau vaalele nei ma ground ia Boeing le Max fleet, ua matua faigata lava ona toe maua ni vaalele ia 800.

O vaalele na lea ua tua uma i ai kamupani tetele nei o le lalolagi, e sui ai latou max ia. Ia o isi kamupani e tai 50 a latou vaa ia ua tutu, o lea la ua tau fai o uma i kamupani lisi e aumai ai ni vaa ia. Ae o lea e taumafai atu tatou e tasi lava se tatou vaa lea e mananao ai. Ua faataugata foi la lisi, ma ua faigata foi la ona maua ni vaalele, ae pei lava o le saunoaga a se tasi o sui usufono, e tasi lava le vaiaso lea na faaletonu ai, ae na sue lava e le tatou vaalele maua, lea e i ai le Millendo lea e i ai nei. E avatu ai lava le faafetai i le Pulega o le tatou vaalele i le naunautai ina ia aua lava ne i faaletonu ia femalagaiga a lo tatou atunuu. E pei o le mea lena sa faataua, aua ne i disrupt le feoai o tatou tagata, ia e pei o se tasi lena o auga autu na faatu ai le kamupani lenei, ina ia taugofie le feoai o tatou tagata ma faafaigofie, lea la ua tulai mai ai i le taimi nei.

E le faapea foi e tatou te fia tauva i isi vaega lapopoa, ae o lea lava e aliali mai, e pei ona faaali atu e le Afioga i le Minisita ma faamaumauga ua i ai i le toatele o tatou tagata ua o mai i le tatou vaalele. Ua iloa i ina le tele o le fesoasoani lea ua maua, ua taugofie vaalele, taugofie atu ai ma vaalele a le vaega lea sa soona faia tatou, lea ua taugofie. E tasi lena penefiti tele, social benefits lea ua mafai ona femalagaai mai ai o tatou tagata, i le taugofie o le tatou vaalele. A o foi i le Air NZ, o la foi ua taugofie, ua le o toe i ai le mea sa i ai, lea ua taugofie aisea? Leaga o lea ua i ai le competition. O le mea lena e tatou te tilotilo i ai. O le aoga lena o le tatou vaalele, penefiti uma i tulaga eseese lea ua faigofie tagata ona omai i saofai ma o mai e tafafao mai i Samoa, o tulaga uma faapena sa le mafai ona fai ona o le taugata.

Ia o le tulaga lena o lo o i ai le tatou vaalele, atonu o Aukuso o le a tulai mai ai se isi a tatou vaa pe afai e oo atu i le taimi lena... e le i mautu mai lava ni tonu. Aua o le mea lea e faalogologo atu i ai i le mataupu lea, e leiloa pe oo lava i le tausaga fou, o tulai mai lava le mataupu lea i safety o vaalele nei. O lo o i ai le isi mau e ono faamuamua lava ona femalagaai vaa nei i Amerika, le max fleets e le F.A.A. Ia leaga o latou vaa, o latou lava vaa, instead in the interest, e vave ona faafelelei ma faatalitonuina le lalolagi, o lea ua sefe le vaa. Ae e i ai foi faaeteetega a Niu Sila ma Ausetalia. O le toalua lava lea aua o i e o i ai tatou vaa pe a aumai, seiloga lava ua faataga mai e latou le vaa lea e

mafa'i ona fealua'i atu, ona faatoa tatou tilotilo lea, i le vaa lea e aumai mo tatou. Ae atonu o le isi tatou Fonotaga, oo atu i ai ua i ai se tulaga ua tau mautu.

Ae o le naunautaiga i le agai i luma, ia lua ni a tatou vaalele, tatou te feoai atu ai ia tatou routes ua leva ona plan, le o i Melbourne, le o i Ueligitone, e o i Kalaisetete nuu ia... e mafai foi ona o tatou malaga i le Region, o i Toga even Hawaii, pe a i ai se isi tatou vaa. O le recommendation lava na aumai, fautuaga a i latou popoto ia na o mai fai le tatou study na ala ai ona toe fai le tatou vaalele, amata i le lua i le tolu vaalele, ona manaia lea. Paga, o lo o taumafai ina ia lua atonu e oo atu i ia tausaga i luma ua tolu, ia ma e agai atu ai lava faapena i luma. Ae o le tatou atinae, e manaomia le fesoasoani mai i ai o le tatou atunuu atoa. O lo o tauave lava le mau, o le vaalele a lo tatou atunuu, o le tatou vaalele, ia omai laia tatou te lagolagoina.

Lau Afioga i le Fofoga Fetalai, masalo na o le pau ia o mataupu sa laga mai, e na o sina toe faaopoopo atu i mea ia o le vaalele, o tatou vaalele ia o le a faamoemoe e aumai, e alu i lalo o le try lease o i ina la e maua ai le taugofie, ona o lea o le a faafaigaluega ai lava o tatou tagata i totonu o le vaalele, ia faapea foi i a tatou ave vaalele. I le toe tupu mai o le faalavelave lea, a ua leva ona sauni a tatou ave vaalele, i le vaalele lea a tatou na tuu e aumai. Ua leva ona sauni a tatou ave vaalele pe faatoa 18 ea, ua uma ona koloni ready to go, ia faapena foi o tatou tagata ia e faigaluega i luga o le vaalele. Ia o lea la ua toe fetuunai uma lava nai na tagata, o lea ua le mafai ona faigaluega ae o lo o maua lava ia avanoa, ma maua ai pea ni o latou totogi ma aoao ai pea ia oo mai... po o le a lava le vaalele e aumai i le Boeing, a o lea ua sauni atu tatou... ma amatalia ma tatou alu loa. Ia ma...

Tofa Lealailepule Rimoni Aiafi (Faleata Sisifo): Lau Afioga i le Fofoga Fetalai,

Afioga Hon LAUTAFI FIO SELAFI PURCELL: Lau Afioga i le Fofoga Fetalai...

FOFOGA FETALAI: Malie lau Afioga i le Minisita o lo o tulai mai le faauilavea a Faleata i Sisifo.

Tofa Lealailepule Rimoni Aiafi: Faafetai lava i lau Afioga, o lea ua maea..ona o lea ua toe oo le Afioga i le Minisita i le tatou vaalele, ia e fesili atu lava i lau Afioga, e talitonu o lea ua tatou lagolago uma i le tatou vaalele. Ae pau le vaega lea e fia maua ai se faamalamalamaga a lau Afioga, lea sa lauga ai le tele o sui usufono, o mea foi ia o logistics. O le mea foi lea ia aumai la le isi vaalele lea, ua i ai uma mea ia, ua mautu uma a la tatou booking system, ia ua i ai se tatou paaga, aemaise la le mea lea o le o atu i le tatou vaa, fia connect i fafo i flights tetele foi ia, ona e toe alu lea toe check out, toe aumai lau ato, e pei o nai isi vaega ia ou te talitonu ua tataua ona galulue i ai, ia taunuu mai le tatou vaa lea e fuafua e aumai, ua mautu atu e pei o vaega taua ia o lea e fai ma tau faaluafesasi ai le malaga mai o tagata i lo tatou vaalele. Ia ma se tatou paaga, aua e ala nei ona tatou pisa o lea e manuia le Fiji Airways, o le latou paaga ma le Qantas, ae a maua sina tatou paaga lelei faapena, ia ua tele le fesoasoani mo tatou uma ma lau galuega, faafetai.

FOFOGA FETALAI: Malo...

Afioga Faumuina Asi Wayne Pauli Fong (Nuu Tu Taulaga i Sisifo): Lau Afioga i le Fofoga o le Fono, e fia faasaina le taimi o le Minisita .

FOFOGA FETALAI: Ou te faauilavea i le saunoaga... ua ou manatu i le paia o le tatou Palemene, ona ua matauina ua faaletonu le tulaga o le eletise. O le mea la lea ou te faamalulu atu i lau Afioga i le Minisita o lo o saunoa, aemaise foi sui usufono o lo o tulai mai e faauilavea, ma le mamalu o le Palemene, o le a faataatiaese le Galuega a le Fono, mo sina minute se i siaki le tatou paoa ma le faaaloalo lava.

Na motusia Felafolafoaiga a le Palemene ona o se faaletonu tau eletise, ma faataatiaese Galuega a le Fono Aoaofaitulafono mo lana malologa masani i le itula 10:10 i le taeao ma toe faaauau i le itula e 11:11 i le taeao.

Na toe faaauau Felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020.

FOFOGA FETALAI: Ou te faasilasila atu ua toe amatalia Taulumaga ma Galuega a le Fono Aoaofaitulafono.

Ma ua ou manatu o la ua maua le fesootaiga ua faapena ona toe faaleleia mai le eletise, ua faapena foi ona toe faaleleia le tulaga o le faasalalauina o le Fono mamalu a le Palemene mo le tapuaiga a le atunuu. Ou te manatu foi ua maua le fesoasoani e faaopoopo ai le malosi i le paia o Taitai o le atunuu e ala i le tatou Fonotaga, ua matu i fau le taliga o le sua, ma le taumafaga ti i leni taeao.

Ou te tapa ma le faaaloalo lau Afioga i le Minisita mo Pisinisi, Alamanuia ma Atinae.

Susuga Hon Papaliitele Niko Lee Hang (Minisita mo Galuega, Felauaiga ma Atinae Eseese): Lau Afioga i le Fofoga Fetalai...

FOFOGA FETALAI: Ia se i tulai mai lau Afioga i le Minisita mo Galuega ma Atinae Tetele a le Malo.

Susuga Hon Papaliitele Niko Lee Hang: Faafetai mo le avanoa, tulai atu ma le agaga faaaloalo tele lava e faailoa atu i lau Afioga ma le mamalu o le Palemene, le tulaga o lo o aafia ai le tatou eletise i le taimi leni.

O le tulaga lea sa pe ai le paoa ae e le i faia le tatou malologa, e mafua mai i le transformer la e i luga i Fiaga, sa faaletonu ma o la ua toe faaleleia. Ia mo le silafia foi e lau Afioga ma le mamalu o le Palemene, o ituaiga tulaga ia e le maalofia. Ma o lea foi tulaga na oo i le transformer e le i ai foi se malamalamaaga o le EPC e ono tulai mai se faaletonu ona o se tulaga foi lea o le oso faafuasei. Ma e lelei foi mea ia o faaletonu, e toe autiloitlo i ai le EPC, e tapena lelei e fai ma siaki tatou transformers. E oo la i le tatou afi lea e i uta i Fiaga, e tatau foi ona make sure o regular maintenance, ia aua ne i tulai mai tulaga ia e mafua mai ona e le o lelei le maintain ina. E fai sina taugata o le tatou aseta lea, ae tatau pea ona toe faamanatu atu i le Pulega o le EPC, ia

manatua o tatou lea e i ai le vaavaaiga o meatotino ia a le Malo, a o le afaigaluega lea latou te faia maintenance, e tatau foi ona tulituliloa ma faamanatu i taimi e fai ai maintenance, ia fai i taimi e tatau ona fai ai.

E pei o se faaaliga lea ma le faaaloalo i lau Afioga ma le paia o le Palemene.

FOFOGA FETALAI: Malo, faafetai, ia e i ai le manatu, ia se i tulai mai le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoui: Lau Afioga i le Fofoga Fetalai, o le pe faafuasei mai lea o le transformer, ua ou manatua ai foi le isi Pule o le EPC na i ai, masalo po o le 10 tausaga talu ai ua tuumalo nei. Sa ou fesiligia pe aisea ua faapea ai le pe gofie o la tatou transformer. Ae fai mai lana faamatalaga faainisinia, o le faapogai, e fai sina mafanafana foi lea e fiafia i ai moa o le atunuu e tuufua ai. Ia na ou fai lea i ai, faatoa ou vaai lea i ni moa faapea. O moa a Samoa e le mamao tele le felelei i luga, ailoga o ni moa.

O le la ou te vaai soo i mea nei o fagaga lupe ou te leiloa po o a nei lupe e felelei solo. E leiloa po o lupe ia e mafua ai, ae o le fautuaga i lau Afioga i le Minisita, se i vaavaai uma ane lupe ia e o ane tuufua i le transformer lena. E tele lava mau transformer ae ua tu lava i le transformer e sau ai le eletise i le tatou Maota. Matua le mafaufau tele lea lupe, ia ae na o se tuualalo lau Afioga po o se lupe po o se moa po o se koa aivao, a e taua lava mea e tutupu e maua ai mafaufauga lelei.

Tofa Olo Fiti Afoa Vaai (Salega Sasae): Lau Afioga i le Fofoga Fetalai...

FOFOGA FETALAI: Malo, faafetai.. ia ona o lea... malie le

Tofa Olo Fiti Afoa Vaai: E fesoasoani atu foi i le mataupu e pei ona saunoa... na pau lava le fautuaga i le Afioga i le Minisita, o le a le eseesega o transformer a atunuu ia i fafo ma tatou transformer? O transformer a atunuu la e i fafo pe e tu ai le talako e le pe. Ia ae manaia ae aumai ni tatou transformer foi ia po o le a le ituaiga manu tele foi lea e le pe, ma le faaaloalo.

FOFOGA FETALAI: Ua maua atu malie ia...

Tofa Olo Fiti Afoa Vaai: Ia ae o le isi mea lau Afioga, na avatu le konekarate i le isi Minisita ae se i vaai o lea e leaga tatou afi ma..

FOFOGA FETALAI: Malie ia le sui usufono soia ia e te sailiili masei i le tatou Fonotaga.

Susuga Hon Papaliitele Niko Lee Hang: Lau Afioga i le Fofoga Fetalai, ou te iloa ou te talitonu i le saunoaga a le Afioga i le Palemia. Ua i ai moa ma toa ma lupe, e leai ni talako i le lalolagi nei o le mea lea e pepelo ia le tala a le sui usufono lea.

Afioga Sulamanaia Fetaiai Tauiiili Tuivasa (Vaimauga Sasae): Lau Afioga i le Fofoga Fetalai, pe maua se avanoa ona o se mea e fia faauilavea ai lenei sui usufono a Vaimauga.

FOFOGA FETALAI: Ia se i saunoa mai le sui usufono.

Afioga Sulamanaia Fetaiai Tauiiili Tuivasa: I le saunoaga foi a le Minisita mo le Samoa Land, ia o lea foi ua malele le Taitai o le atunuu, ma aumai foi lona finagalo, aemaise foi le Minisita o le EPC, ae o le itumalo lenei o Vaimauga, e pei ona fai atu e lotea loa ou eleele, e i ai ou tapuafanua ma ou eleele sa lea na pe ai le paoa. Ia o le mea lena e tataua ona fia faamalamalama. So o se taimi lava e taua ai ou eleele, e faapena ona o mai ai lau vaega.. lea la na ou alu atu i fafo ma ou fai i ai, e faaola mai le paoa, lea ua ola mai.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi: Lau Afioga i le Fofoga Fetalai...

FOFOGA FETALAI: Ia, se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi: Se faamolemole pe mafai ona faatonu le sui usufono, se i alu ia i le latou nuu ona fai lea o latou tala faa aitu. Ao le mea lea tatou te talanoa i ai, o le eletise lea ua pe.

FOFOGA FETALAI: Ia malie le sui usufono, se i e afio i lou itumalo ona outou talanoa lea ma aitu, tulou. Ia ae lafo atu ia i lau Afioga i le Minisita o Pisinisi, Alamanuia ma Leipa ia faapea foi le tamaoiaiga.

Afioga Hon LAUTAFI FIO SELAFI PURCELL: Ia toe faatalofa faatolu atu i le mamalu o le Maota i leni aso. Manaia foi na i commercial laiti faapea e faanofo gofie ai le tatou Fonotaga. O le fautuaga foi i le uso a Minisita, matua ave lelei ni sign e tu i luma o tatou transformers ia, ua sa ni lupe ona toe momoe i i. Ia atonu e le toe tupu ai ni mea o lea o le a oo mai a tatou taaloga ne i te i ua pe le paoa o la e o le a tini le tuuga, ona le maua lea o le taimi o le gold medal a Samoa.

Susuga Hon Papaliitele Niko Lee Hang: Lau Afioga i le Fofoga Fetalai....

Afioga Hon LAUTAFI FIO SELAFI PURCELL: Ia o lau tala ula ae o lea e fai atu lava ia tala ula ae o lea o le a ita le Minisita.

Susuga Hon Papaliitele Niko Lee Hang: Na o le tuualalo i le Afioga i le Minisita, e fia maua la le gagana lea e faaaoga e lupe, se i fai ai la le sign lea mo lupe, aua e le malamalama lupe i le gagana a tatou, ma lou faaaloalo lava.

FOFOGA FETALAI; Ia, atonu e maua mai i le sui usufono o Vaimauga se gagana lelei e faatino ai le tulaga lea.

Afioga Hon LAUTAFI FIO SELAFI PURCELL: Ia lea e fai mai le Minisita ia te au, o lea e nonofo ma le faamatua... le Afioga ia Sala, e malamalama lelei i gagana a mea nei o lupe ma moa, aua e tele le lafumoia ma lupe a le toeaina.

Ia lau Afioga i le Fofoga Fetalai, toe faaauau atu nai mataupu na laga mai e le sui usufono o tulaga uma ia o lea e galulue ai le tatou vaalele. E le taugofie le tatou oo atu i totonu o mea nei o logistics e pei ona talanoa ai, o mea uma e moomoo i ai le loto, ae o le faalavelave, e tasi le tatou vaalele. Tau atinae ia ni a tatou tupe, se i faamuamua auaunaga i o tatou tagata iinei i Samoa ma Niu Sila, ia ae o lea lava ua tilotilo foi i tua atu. E tele la le aoga o tulaga ia pe a maua se isi a tatou vaalele, lua pe tolu, ona tatou alu loa lea i mea na e connect atu lava alu sao i fafo o tulaga uma faapena, o lo o galulue ai le tatou kamupani i le taimi nei.

Lea ua tatou i totonu foi o le system tele lea a le Armadales e taugata foi lena system. E tau faafaigofie ai le faia o le tatou online bookings. O mea nei o online bookings e tele lava le technical logistic e i ai i totonu, aua e i ai Faletupe latou te taliaina visa cards foi ia e aumai i isi atunuu lea e book mai... ia ae pei o tatou e na o le Faletupe lava lea a le BSP lea e mafai i le taimi nei. Ia o tulaga uma na o lea e taumafai ina ia faafaigofie ona book mai tagata mai fafo aemaise lava ia nuu mamao atu i tua atu o Niu Sila ma Ausetalia. Ao tulaga uma na o lea e galulue ai le tatou kamupani, lea foi e tatou te faipaaga, o lea lava e i ai le tatou gold share ma Fiti, ae o le taimi nei o lea ua ese foi le mea la ua i ai le priority a Fiti e taumafai e fai se faiga i vaalele ia ua tutu ua le feoai. Ae ua leva lava ona faagaioi mai ia le tatou gold share ma Fiti, ia o lea foi e tilotilo i se tatou partnership ma le Qantas, i le tatou va i o i Ausetalia, e tatou te faifai mea faatasi ma le Qantas, ma tatou o ai i le mea foi lea o le Reward System a le Qantas o le Skyways ea le tauga, e maua ai airpoints a tatou tagata, e feoai ai, pe a feoai a tatou vaalele.

O mea uma na o lea e galulue ai mo le silafia e le mamalu o le Maota nei, leai lava ni mea faapea o lape ai, pau lava le mea, o le maua o tupe ma faatino uma ai mea nei, atonu e uma atu lena tausaga ua tulai mai i le tulaga sili atu le lautele o le tatou auaunaga. Ia faapena foi i isi mea na faaalia e isi o sui usufono mamalu, i pasese pau i taimi o low season, ia o la foi e i ai strategies a le Ofisa o le tatou Vaalele, i masina ia ua faapau i lalo ia tatou malaga ina ia... ia ma le pasese lava nei, e sili atu lava le pau o le tatou pasese, i lo pasese uma lava o vaalele ia tatou te feoai ai. O le agaga lava lena na tatou amata ai i le amataga, ia pau pasese o le tatou vaalele, ia o lea la... a ou tilotilo foi lava i tulaga uma na, faataugofie ni pasese ia ae fuafua foi i le profitability o le tatou vaalele. E le faapea foi o le a o lava i le faamalieina o tagata i ni pasese lava e le talafeagai, ae tilotilo i le isi auala, e faamisi le flight i lea aso, po o lea aso i taimi ia low season e i ai lava tulaga faapena.

E oo foi i tulaga i uta, ia lea sa laga foi e sui usufono, o lo o naunau lava le tatou kamupani, ina ia tatou maua air freights nei, o le tatou vaalele lava lea sa faamoemoe e aumai ai uta e tele, o le tasi lena faamoemoega sa i ai, tele le capacity e lau ai uta, a o lea tatou te taumafai lava i uta o lo o maua i le taimi nei, ina ia mafai e le tatou vaalele lea o lo o fealua nei ona tauave.

Ia atonu e pau ia lau Afioga, te i foi ua toe pe le paoa, ae o le a faauma atu ia le lauga. Si ou itumalo o Satupaitea, faamalo le tapuai, faamalo mo la outou tatalo, tatou feiloai pea i taimi paganoa, ona o le tele o tuatuagia, ia ae lou itumalo, faamalo lava lo outou tapuai mai. E malosi lava ma toa le loto, pe a ou mafaufau o lo o outou lagolagosua mai i taumafaiga a lo outou sui usufono, ina ia tele lava se sao o Satupaitea i totonu o faigaupu a lo tatou Malo. Ia si ou tina o Anesoia, e le taitai misi le loomatua lea le fonu lena. Lea ua i ai ma mea ia, e le mafai ona misi. Pe alu i Niu Sila po o Ausetalia, e aumai lava lana tapuaiga oia manuia lau usugafono.

O le mea foi lea ou te tu ai ma toa lou loto e tautala, ona ou te iloa o lo o tapuai mai au e si ou tina, ia faamanuia pea le Atua ia te oe Ane, ia maua pea lou soifua tatou te mafuta ai. Ia lea o le a lata i le 90 ou tausaga. Le mamalu o le tatou Fonotaga i lenei aso, ia manuia le toe itula o le tatou Fono, i latou o le a sauni atu aua le tauvaga i taaloga o le Pasefika, o outou mama na.

Lau Afioga i le Minisita, ia manuia lo outou alofaiva, o Samoa lena tou te o ma outou, o Samoa lea o le a alo atu e tapuai atu outou faiva. Lau Afioga i le Palemia, ia lele sao lau a , ia maua lava lau 300 ai i taimi uma e te fana ai, leaga e i ai nai aiga na e latalata ifo i ina te i ua sasi se a , te i lava se toeaina o la e valalu popo o lana faalifu, ae tu ai le a . Ia ae o outou mama na, ia manuia lenei aso lau Afioga i le Fofoga Fetalai, soifua ma ia manuia.

FOFOGA FETALAI: Ia malo faafetai, ia se i vaai pe e te le o tau faafulu i le fana a le toeaina. Ia malo faafetai saunoa lau Afioga i le Minisita, ia ma o le avanoa foi lenei ou te tapa ma le faaaloalo lau Afioga i le Sui Palemia.

Afioga Hon FIAME NAOMI MATAAFA (Sui Palemia, Minisita mo Punaoa Faalenatura ma le Siosiomaga): Tulai atu ma le faaaloalo, lau Afioga i le Fofoga Fetalai, faatalofa atu i lau Afioga ma le mamalu o le Fonousu a lo tatou atunuu. Piiama i le taulaga siitia i lenei taeao e lau Afioga, e faafetaia le alofa ma le agalelei o le tatou Matai, ua taitaiina mai lenei Maota i le lagi e mama ma le soifua lelei i lenei taeao. Lau Afioga i le Fofoga Fetalai, sa tatou le auai i lea vaiaso ona sa toesea i le faigamalaga faalemalo, auai atu i Fonotaga a se tasi o Faalapotopotoga a le tatou itulagi o le SPC. Ae faafetai ua toe talii mai, maua mai le faaiuga o le tatou mataupu o lo o felafolafoai ai i luga o le Tala o le Tupe 2019/2020.

E fia fai foi se sao e lagolago i le pitolaau a le Malo e talifuaitea e tusa ai foi ma le tatou felafolafoaiga i saunoaga a sui usufono, aemaise foi o le lipoti a le tatou Komiti o Tupe maua ma Tupe totogi sa gafa ma le iloiloina o le tupe e pei ona faatulaga mai e le tatou Matagaluega o le Tupe e tauala mai i le Afioga i le Minisita.

Ma e amata atu sau faamatalaga lau Afioga i le Fofoga Fetalai, i le lipoti a le tatou komiti lenei o Tupe maua ma Tupe totogi, e faasino i Matagaluega. Ma o lo o matauina lau Afioga i le Fofoga Fetalai fautuaga ua faapea ona faataatitia mai mo le Matagaluega lenei o Punaoa Faale-natura ma le Siosiomaga ma e talia ma le faafetai fautuaga ua tuuina mai. Matauina lau Afioga le mamalu o le Palemene o lo o i ai se mataupu o lo o laga mai e le komiti, e faatatau lea i faamatalaga e tuuina mai i poloketi. E le taumate lau Afioga i le Fofoga Fetalai ma sui mamalu o le Palemene, e le na o le Matagaluega foi lenei o lo o i ai a tatou poloketi. Ae ou te manatu e taua foi le finagalo faaalua o le komiti, ma ou te manatu o faatalatalanoa foi i la matou Matagaluega e tusa ai ma le laga mai e le komiti o mataupu nei o le lipoti mai o poloketi. E ao lava ona silasila foi la tatou Matagaluega o .le Tupe tauala atu i lau Afioga i le Minisita o Tupe. E faapena ona talatalanoa i Matagaluega ina ia faapea ona atoatoa ia faamatalaga o lo o fia maua e le komiti o le Palemene e tusa ai ma tatou tupe nei. Ou te manatu o se mea taua lea, aua e lua lava vaega tetele o le tatou tupe o lo o faagaioi ai lo tatou Malo. O a tatou lava tupe maua, faapea ma tupe o lo o maua mai ia tatou paaga, ma e ao lava ona atoatoa la tatou faaogaina o ia vaega tupe aemaise foi o le tatou lipotiina ina ia manino ma atoatoa le silafia ma le malamalama i le faatinoina o ia polokalame.

O le isi vaega e matauina o le \$600,000 sa i lalo o le tala o le tupe faatatau o le Matagaluega., e totogi atu lea i le NPF mo fanua sa avea. O lea ua maua, ua ova le tupe ua totogi ma o lea ua fautuaina mai le tuuese mai o le \$600,000 ae tatalo atu pea i lau Afioga i le Minisita o Tupe ma le Matagaluega e ono manaomia pea e le tatou Matagaluega vaegatupe nei mo tau i o tatou fanua e ave e le Malo mo ana atinae. E pei o nai mataupu ia o lo o aumai i le lipoti a le komiti, ma ou te faafetai ai i le agaga galue ma le auiliili o le komiti ma le tuuina mai i totonu o le tatou lipoti. Ma e pei ona talanoa atu ua talia ia fautuaga e pei ona faataatia mai.

Lau Afioga i le Fofoga Fetalai, ua ou maua i faamaumauga foi a lo tatou Palemene e le i toatele naua nisi sa saunoa i ni mataupu o le Matagaluega o lo o ou tauaveina. E vagana ai se finagalo faalauaitale e faasino lava i le tulaga lenei o le fesuiaiga o le tau ma ona aafiaga. O le mea muamua la i lau Afioga i le Fofoga Fetalai ma le mamalu o le Palemene, o aafiaga o le atunuu i suiga o le tau, e le o tu tasi i se Matagaluega ia le tauaveina o galuega e tali atu. O lo o faapea ona faasalafa i Matagaluega o lo o pito aafia i suiga nei. Ma e mafai ona tatou faapea e cross sectoral pe faapafala le vaaiga a le Malo i lo tatou tali atu i suiga nei. O lea tulaga lau Afioga i le Fofoga Fetalai, e fai ma faaitaiga a tatou vaega maoti po o sectors nei, o lea o lo o i ai le vaega a le turisi ua fai foi la latou fuafuaga faapea le soifua maloloina, o le Matagaluega o Faatoaga, faapea foi le vaega o vaomatua. E le gata foi i lea, e pei foi ona saunoa mai le sui mamalu, o le galuega mo a tatou auala o taligalu, ma le fausaga foi o o tatou fale ma le vaai i le tulaga e tataua ona ausia, e tali atu ai i suiga o le tau. Ma e pei o vaega ia o le tatou atunuu o lo o taulamua i le tali atu i suiga o le tau.

E fia fai sau faamatalaga i le tatou vaega lea tumaoti o malosiaga po o le energy sector. E pei ona silafia, ua faatulaga e le Malo se fuafuaga i le tatou oo atu i le tausaga 2020-2025 ua 100% le faatinoina o le malosiaga faaeletise (i malosiaga faafouina) i totonu o le tatou atunuu. Ou te manatu lau Afioga i le Fofoga Fetalai, e le o se galuega faigofie ia le faamoemoe e pei ona faatulai e lo tatou Malo ae o le fua lea o le tatou faatauina o a tatou gaoioiga, mo le tali atu i aafiaga o le tau. Ina ia faaitiitia le faamoemoe o le Malo i suauu, o lo o mafua mai ai kasa o lo o faapena ona afaina ai lo tatou siosiomaga, ma faatupu ai le vevela lea o lo o mafua mai ai ia suiga o le tau. Lau Afioga i le Fofoga Fetalai, e toatele a tatou Matagaluega o lo o faapena ona soosoo tauau e tali atu i suiga o le tau, e le gata i le faaaogaina lava o a latou paketi o lo o fuafua mai i lea tausaga i lea tausaga e pei foi o le Matagaluega lenei. Ae faapena foi ona faaaogaina ia fesoasoani o lo o tuuina mai, mai a tatou paaga faaleatinae. Lau Afioga i le Fofoga Fetalai, ua maea foi ona tapena ma sainia ni fuafuaga po o ni plans e le Malo ma alalafaga ma itumalo uma o le atunuu. O lo o faapea ona faamauina vaega taitasi ua matauina aafiaga ona o suiga o le tau. Aemaise foi o fofo talafeagai ma gafataulimaina aua le tali atu i suiga o le tau. Ma o nisi nei o galuega ua amata ona faagasolo aemaise o vaega o le suavai. O le agaga o le Malo ma ana paaga, ia tulimatai nei fuafuaga mo galuega manaomia uma ma fesoasoani e faaoo mai mo le tali atu i suiga o le tau ma mala faalenatura. E faapea foi i le Malo i ana galuega i lana paketi o lo o limataitaina uma ai a tatou fuafuaga nei. Aemaise i auala taligalu ma alavai.

Lau Afioga i le Fofoga Fetalai, e pei e i ai se manatu foi lea, aua e pei e lua Matagaluega o lo o faapea ona faatulaga mai ia fuafuaga. O le Matagaluega lenei o le Siosiomaga ma Natural Resources ma le Matagaluega o Tina ma Tamaitai o lo o faapea ona faatalanoaina nuu ma afioaga ma itumalo, e tusa ai

ma atinae o lo o manaomia. Atonu e i ai se manatu foi lea, o le a avea lea faatalanoaina ma faia o fuafuaga e faatupu ai le luita pea o le Malo po o afea e fai ai le mea lea ma le mea lea ma le mea lea. Pe mafai ai ona faapea i le faaupuga faaperetania ua tatou faatupu expectations o le atunuu Ae ou te tautala ma le faaaloalo lau Afioga i le Fofoga Fetalai, o le faia o nei faatalanoaga ma fuafuaga, tatou te iloa uma ai mea ia e manaomia. Ma e fua i ai a tatou gaoioiga e tatau ona fai. E le gata la i gaoioiga a le Malo ma le lagolago mai a tatou paaga tau atinae, ae o le isi galuega tele po o le a galuega e mafai lava ona faatino e nuu ma afioga ma le tatou atunuu. E le tuutasia i lo tatou Malo, mea uma nei aemaise le tatou tali atu i le suiga o le tau, o mea lava e ao ona o tatou faia. Ma o lea foi tatou te malamalama o aafiaga o le tatou siosiomaga e moni o le suiga o le tau, ae i ai foi le isi vaega o gaoioiga lava a le tagata soifua ma lana atinae, po o ana gaoioiga o lea foi o lo o aafia ai lo tatou siosiomaga.

O nisi o fofo o lo o tuuina atu e tau foia ai nei faafitauli o lo o feagai ma i tatou, o le toe totoina o le gataifale ma le vaomatua. O le taumafai e agai ese mai tatou mai le gataifale ae o atu i uta. E le o se mea fou foi le talanoaina o lenei mea o le mea ua leva foi ona tatou talanoa mai ai. O lea foi na fua ai o tatou auala e faapena ona faafaigofie ai ona amata ona faagasolo atu a tatou nuu a tai, e faasolo atu i uta aua lava le saogalemu ma le puipuia mai i suiga ia ua tatou matauina. O le isi foi itu aemaise lologa, o le faamaualuga lea o le fauina o laoa ma fale, ma le isi mea e talanoa atu ai pea i le mamalu o le Fonotaga a le atunuu, o le tapueina lea o nofoaga mo le suavai aemaise o tatou gaoioiga i totonu o nuu ma afioga e puipuia mai nofoaga nei. O nei galuega e galulue faatasi ai nuu ma le Malo po o galuega tetele foi o lo o faapena ona fesoasoani mai ai paaga. Ae e ao ona tatou manatua, o nei galuega o lo o faatino e Matagaluega o lo o gafa lava ma nei gaoioiga. Ou te matauina pea i le tutulai mai o sui usufono ma saunoa mai ma aumai a outou talosaga, e tusa ai ma le manaomai aemaise o tatou taligalu ma tatou talivai. O le mea moni lava lau Afioga i le Fofoga Fetalai, so o se galuega po o so o se atinae tatou te fua le tau ma le faamanuiaga o lo o maua mai ai. E fua le galuega laveai i tau o aseta o lo o i ai, ma faamanuiaga o lo o faapena ona mafai ona maua mai ai. O le ala foi lea o le a agai i ai le faamuamua i taligalu mo auala tetele, aua e faaoga auala e femalagaai ai le toatele o le atunuu. E pei foi ona saua i se faamatalaga i le Lipoti a le tatou Komiti o Tupe Maua ma Tupe Totogi, e fai o tatou tupe maua o lo o faapena ona faasoaso mai lea tausaga ma lea tausaga, ae faapena foi le tatou faamoemoe i fesoasoani o lo o tatou maua mai.

Lau Afioga i le Fofoga Fetalai, o le masina fou o lea o le a tatou talimalo ai i taaloga a le Pasefika, ma o lo o i ai foi le faamoemoe e faaogaina lenei tauaofiaga a le tatou itulagi e molimoli ai pea le feau mo le faatauaina o lo tatou siosiomaga. Ma o lo o tapena le Matagaluega faapea ma le tatou Faalapotopotoga o le SPREP, ina ia faapena ona avatu pea lea feau ma le tulaga e taumafai a tatou tapenaga e faaitiitia le faaogaina o plastics i le tatou taligamalo, ona o lea ua i ai a tatou faiga faavae e faapena ona faaitiitia ai. Ua i ai le tatou Tulafono o Taga Plastics, single use plastics faapea foi ma straws, a o lo o i ai lava le faamoemoe e faaauau le polokalame o le faaitiitia o le faaogaina o plastics, ina ia faapena ona tau tetee atu ai i le mauga o le lapisi ua tupu nei i totonu o le atunuu, tainane le lalolagi atoa e aafia ai foi ma o tatou sami i le tele o le faaogaina o tatou plastics.

E fia faaaogaina foi le avanoa i le auai mai o autaaalo e lagolago mai i le tatou polokalame o le toe totoina o laau, o le isi lava lea itu taua tatou te tali atu ai i le suiga o le tau.

Lau Afioga i le Fofoga Fetalai, e pei e tasi le isi mataupu sa laga e uiga lea i fanua, o fanua e ave e le Malo pe lisiina e le Malo. O lea ua ou maua sa faapea ona tali le Palemia, ae o le a le toe i ai se isi faamatalaga. Tau o lenei, ou te manatu lau Afioga i le Fofoga Fetalai ma le mamalu o le Palemene, o lea o lo o loma le toe foi mai o le Tulafono o le Faaliliuina o Fanua Faaleaganuu i totonu o le Maota lenei, atonu o le isi lea avanoa o le a mafai ona toe talanoa auiliili ai nisi o mataupu e pei ona faapea ona laga mai e sui usufono o le Maota.

Lau Afioga i le Fofoga Fetalai, ua maea atu ai sa matou faamatalaga. Ia manuia tele laasaga o lo o totoe o le tatou mataupu o lo o i le Laulau a Fono a le Palemene. Soifua ma ia manuia.

FOFOGA FETALAI: Malo faafetai saunoa i lau Afioga i le Sui Palemia e tusa ai o mataupu sa laga e sui usufono mamalu, aemaise foi o aotelega o fuafuaga alualumamao a le Malo ina ia faapena ona talafeagai taiala e tapena i ai le Malo ia ogatasi ma fesoasoani mai fafo aemaise foi o se finagalo o itumalo taitasi, i le latou foi pitolaau o le galulue faatasi ma le Malo. Malo faafetai.

Ia, ua oo mai le faasologa i lau Afioga i le Palemia i nisi faaopoopoga pe afai e tusa ai o lou finagalo.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEIGA OI:

Lau Afioga i le Fofoga Fetalai ma le mamalu o sui usufono o le Fono Aoao Faitulafono, ua maea ona talifuaitau Minisita o le Kapeneta e faamanino mataupu sa laga i a outou saunoaga, ma o le faataua o finagalo faaalua e le Kapeneta, lea foi o lo o ua auai mai ai ma Ofisa Sili o Pulega o Matagaluega ma Faalapotopotoga Tumaoti a lo tatou Malo, latou te matau ma faamaumau o outou finagalo faaalua aua gaoioiga tatau ma talafeagai ma seleni ua mafai ona tatou maua e faatino ai a outou talosaga ua i lumamea. Aisea? O latou ia o lima ma vae o le Malo e faatinoina outou manaoga, aua o outou lava o Taitai o Samoa na filifilia ma tofia, e lufilufua le sosia ua foai mai e le Atua, o mea ua tatau mo lea aso ma lea aso tatou te tua i ai i lenei tausaga fou faaletupe a lo tatou Malo.

E pei lava foi o Malo uma o le lalolagi, o Malo e le tagolima ma Malo mauoloa, e le mafai lava le mafai ona faatino, i se tausaga se tasi le anoano o mau manaoga, e ao ai ona fai nisi mea aupito manaomia ae tuu atu isi mea i le lumanai e faasolosolo ona fai.

O le mea lea e taua ai tele le lava o le onosai. O upu malie ma le faagauloto e faasogofie ai le loto ina ia gauai, a o le soona avaavau, e tupu ai foi ma le musua. O le Minisita foi ia e le o se agelu, o isi foi tagata soifua, e i ai foi uiga lelei, ma uiga foi o lenei lalolagi felanulanui. O lo o lava pea le taimi o le tatou Paeaiga, o le atinae foi e fai i le amataga o le Paeaiga, e oo atu i le isi faiga filifiliga, ua matua le manatua lava e latou e masani i le le fia manatua o ni mea lelei sa fai i le suamalie o faatosina a le isi foi eli tuugamau.

A o faagasolo saunoaga faalauaitale, sa ou manatu ai, e ao lava ona fai se upu i o tatou tiute faa-faipule o le Fono lenei Aoao Faitulafono, e faamanino atili ai le taua o lo tatou faalupega, o le itutino lenei o le Malo, o le pule aoao

tutasi a le Palemene, Supremacy of Parliament. Ma o le a le uiga o lea faalupega uiga ese ma maoae? O lona uiga moni, o le Maota lenei e faia Tulafono, e faatonutonu tatau ai le ola fiafia ma le ola saogalemu o tagata uma o Samoa. E maea loa ona tatou pasia se Tulafono ma tatou ulufale atu i fafo i faitotoa ia e tutu mai o le Maota lenei Faitulafono, ona tatou manatua lea o tatou o isi foi tagatanuu o le tatou atunuu, e tutusa lelei ma tagatanuu uma lava o Samoa, ma e ao ona tatou muai usitaia ma mulimulitui i Tulafono na tatou pasia i totonu o le Maota lenei. Tatou te muai faia le faataitaiga lelei o Tulafono e usitaia e tagata uma o le Malo, e usitaia e tamaitai ma alii faamasino, e usitaia e i latou maufofi o le tatou Malo, O Le Ao o le Malo, Sui o le Fono a Sui Tofia, Palemia ma Minisita o le Kapeneta, o matai ma taulelea, o faletua ma tausii, o augafaapae. E usitaia e Faifeau po o auuauna uma o le Talalelei ma o latou faletua. E usitaia e Tiakono, o Fesoasoani, o Epikopo ma Pilisitua, o fanau laiti, e oo lava i pepe faatoa fananau mai, po o pepe foi ua faapau e tina.

O le ala lea e molia ai le tina i le limatete i le pepe po ua faapau foi le alualutoto nai le manava, ona ua avea lona alualutoto o le tagata ola ua i ai foi le agaga o le foafoaga a le Atua. O le uiga tonu lea o le upu tatou te gagana ai i le faa-Peretania, o le Rule of Law. I le faa-Samoa, o le Paiaaga o le Ola i le Tulafono, e tutusa uma ai tagata uma i le Tulafono. Ma o lo o tamau foi i le Vaega 15 o le Tulafono Faavae o le Malo Tutoatasi o Samoa, o le Tulafono aupito maua luga lea e fua faatatau uma i ai Tulafono a lo tatou Malo. Pe umi lou soifua o e tautua i le Malo, na ona e soli lava o le Tulafono Faavae o le Malo, molia loa ma oe. Ua molia ma faasala le Palemia, Minisita o le Kapeneta, Faipule o le Palemene lenei, o Faamasino, o Faifeau, o alii sili o nuu, o tina, o fanau laiti. O le tatou matafaioi tumau la i le Palemene lenei, o le fausia ma pasia Tulafono ona lafo lea i alii ma tamaitai faamasino e faauiga ma faatino e latou le Tulafono o lo o faatonutonu ai le soifua o tagata, ae mulimulitui foi Faamasino i ala o le Tulafono, na pasia e le Maota lenei. O Faamasino foi latou, ua lava taoso i le latou foi matafaioi faale-faamasino.

O le Pule aoao tutasi la a le Palemene po o le Supremacy of Parliament, o le pule e fai ai Tulafono, ae le o se pule e soli ai Tulafono na pasia e le tatou Palemene, ma e leai se isi e ola i luga atu o le Tulafono. O lo o aumai e le Feagaiga Fou le tala i le faigamalaga a lo tatou Alii i Ierusalem ma ona matua ina ua 12 ona tausaga. Fai mai o le tu ma aga lea faa-Isaraelu, a ausia loa le 12 tausaga o le tamaitiiti, ona e ausia loa lea o le taimi ua mafai ai ona tau oe o le tagata ua matua. You have come of age. O lona uiga, o a au mea fai, e le toe aafia ai ou matua i le tatou augatupulaga ma nei ona aso. O lou ausia o le 21 tausaga e taua ai ua avea oe o le tagata matua. A o Ierusalem i le taimi lona o le 12 o tausaga lea na mafua ai ma o le auua atoa lona o le faigamalaga, lea na sau mai savali, savavali mai Nasareta e agai mai i Ierusalem i le malumalu.

O upu tomua pei ona faamaumau ai i nisi o faamaumauga a le Ekalesia Aoao e faapea, na taunuu atu loa fai loa le sauniga. O le tautalaga puupuu lava a Iosefa na faapea atu ai ia i latou e toatolu o alii, o polofesa o le Tulafono, ò lou atalii lenei o lona igoa o Iesu, ua ausia tausaga ua avea ai o ia o se atalii ua matua lona soifua, ma o a ana mea e fai, e tietie lava i ona luga, o le a le toe tuuaia ai au o le tama. ò Ia ona amata loa lea o le suesuega, o le suesuega lona i tali, mafai loa ona sainia ma le tusi faamaonia ua e pasi, ua e matua. O le fesili muamua, òtago i le tusi lea e faitau mai, o le catalogue o commandments. ò Ia manatua foi, na o le sefulu a Tulafono na aumai e le Atua ia Mose, ae oo mai i

le taimi lea ua 613 Tulafono ua faafefete ma faaopoopo e le au faresaio. Ona faitau loa lea e Iesu le Tulafono i le leo o le tamaitiiti faatoa 12 tausaga. E le i umi ona faitau le Tulafono, ae taofi loa. Fai mai loa le head, le faaululuga o le toatolu lea, òua lava, toe faafoi mai ia te au le Tusi Taai. ò Ia ona alu atu loa lea o Iesu tuu i ai le Tusi Taai. ò Toe foi i o i le mea na e tu mai ai. ò Ia ona toe foi foi lea o le tamaititi leni 12 tausaga tutu i le mea sa tu ai e i luma mai o ona matua pe a ma le lima iata. Ona fai atu loa lea o le faaululuga o le toatolu, ò faaaauau. ò Ia ona pese mai loa lea o Iesu i le vaega atoa o le catalogue, lea ua aveese le tusi faitau, a o lea la ua faaaauau. Ma o i e talia ai e latou o lo o faia le suesuega po ua fetau ma tatau ona saina le tusi faamaonia, ua avea loa Iesu ma tagata matua. Ia ona faitau lava lea o Iesu tauloto, i le taimi e le o iloa e latou, o le Atua leni o le second person of the blessed trinity, o lona lua o peresona, o le blessed trinity, tolutasi. Ona alu alu a lea, a o la e siaki uma e le toatolu lea, e leai a ma se mea e misi. Ia a faapefea ona misi o le Atua Silisili Ese ua liutino tagata? Ona fai mai loa lea o le fai suega, òua lava, ua lava lena. O e malamalama i mea na e te faitauina? ò Tali Iesu, òou te malamalama faatasi ai ma ona tala atu. ò Ona fetilofai lea o le toatolu, toe sau le fesili, òo le a le uiga o lau faamatalaga? ò òO le uiga o lau faamatalaga, ua malamalama uma outou o le au ositaulaga i Tulafono, a o le faalavelave o le toatele o outou tou te le o ola ai. ò

Lau Afioga i le Fofoga Fetalai, o le taua ia o le fasi fuaiupu lea ona e taua tele ia i tatou o le aufai Tulafono, tatou te fausia ma tatou pasia Tulafono, ae tatau foi ona taulamua tatou i le ola ai i le Tulafono. O le taiala leni o le paiaaga o le ola i le Tulafono po o le Rule of law, na afua mai i vesiga na tupu i le tausaga e 1600, 16 seneturi talu ai i Peretania tele, ua fesiligia ai e tagata lautele lo latou foi tupu ma faapea ane, e ao ona tausolomua foi le tupu ia ona aua ne i ona solia ana Tulafono, aua o aga na faatupu i na ona po, e atamamai tele e fau Tulafono ina ia usitaia e isi ae soli faasoloatoa e le tupu Tulafono faatasi ai ma lona aiga. O le fesili, o ai la e vaai totoaina le tausisia o le ola i le Tulafono? O le tali, faasino lea o le ola i le Tulafono o tagata lautele faatasi ai ma tatou o tagata o le Malo. O le tali, o latou ia ua aloaia tofiga e le Faavae, o tofiga faaletulafono o le Tulafono Faavae o le Malo, o le Tulafono Sili lea, ia aua lava ne i solia e se isi lava Tulafono. O ai la i latou ia o tofiga faale-Faavae e ao ona latou vaaia totoa o lo o usitaia Tulafono ma fai i ai faaiuga e faapei foi ona faataoto mai i le Faavae ma Tulafono e faatino ai le Faavae.

Muamua, o Leoleo, o latou ia o Malu o le Malo. O lo o ia i latou le power e suesue ai so o se talosaga e faasaga i se isi lava na solia le Tulafono e aofia ai ma i tatou uma lava i totonu o le Maota leni, faapea foi ma i latou uma lava na galulue i lala eseese o le tatou Malo, ma molia loa pe afai ua tatau ai i le latou faamasinoga tonu e faapei ona faasino mai e le Tulafono Autu a le Matagaluega o Leoleo.

Lua, o le Ombudsman po o le Komesina o Sulufaiga na faatuina i le tulai mai o le Faigamalo leni a le HRPP, ua tuuina atu ia te ia le power faaletulafono e mafai ai ona toe tagofia se faaiuga matuia ua aafia ai so o se isi o le atunuu ua mafatia ona o se faaiuga ua faia e so o se Matagaluega po o se Faalapotopotoga a le tatou Malo. Ua leai se isi faamoemoe toe pau lava lea o le faamoemoe o le Komesina o Sulufaiga, e ave la i ai mataupu ona toe lipoti mai lea ia te au nei mo se gaoioiga e tatau ona fai e le Kapeneta. O i tonu i le gaoioiga lea faa-Komesina o Sulufaiga lea na mafua ai ona faamalolole isi foi Komesina o Leoleo ma le Pule o Tafaigata. Na ona ou taua o nai vaega ia, ae tele isi mau iuga soona fai e Matagaluega a le tatou Malo na toe faasaosao,

ona o le fesoasoani mai a leni foi auauna o le tatou Malo, le Komesina o Sulufaiga. Ma e responsible direct i le tatou Palemene.

Tolu, o le Loia Sili a le tatou Malo. O le matafaioi faaletulafono a le Ofisa o le Loia Sili o le faatino loa o moliaga faaletulafono i totonu o le Fale Faamasino e faapei ona amatamea mai ai le Mataglauega o Leoleo faasaga i so o se tasi lava ua solia le Tulafono. E silia i le 50 loia o lo o lagolago i le Loia Sili o le tatou Malo, ma le anoano o le mau loia o lo o galulue o lo o galulue i totonu o Matagaluega ma Faalapotopotoga taitasi. O lona uiga ua matua lava taoso Matagaluega uma a le Malo ma loia o lo o i ai e latou te silasila lelei i le faatinoga o gaoioiga a le tatou Malo ina ia ogatasi ma Tulafono.

O le fa o tofi lau Afioga i le Fofoga Fetalai, tofiga faale-Faavae, o le Suetusi Sili. O lana matafaioi, e suesueina e le latou Ofisa tusi o faamaumauga o tupe alu ma tupe maua a lo tatou Malo, faatasi ai ma meatotino a le tatou Malo ma lipoti sao mai i le Palemene leni e faatino ai lona tutoatasi. E le lipoti atu i le Malo ia te au ma le Kapeneta, ae lipoti sao mai i totonu o le Palemene, ona o leni, o outou lava o sui o tupu ma ee o Samoa.

Lau Afioga i le Fofoga Fetalai, o le tulaga lena ou te manatu e tatau ona malamalama i ai sui usufono o le Maota leni, ona o lea sa agiga i nisi o saunoaga, e pei e foliga mai e molia loa se tasi o tatou e pei e foliga mai o lea na sau i le fale paepae le faatonuga. E leai. O le tiute, o le matafaioi lena a le Loia Sili. Ma e pei a ona ou taua, na molia le Palemia, a o le Palemia o le Minisita lea o Leoleo faapea foi ma le Ofisa o le Loia Sili. Na molia Minisita ma ave i Tafaigata, na molia faipule, na molia foi faifeau, ia ma tupu ma ee o Samoa ua soli le Tulafono, ma e leai se isi e saoloto i luga atu o le Tulafono.

O le mafuaaga lea ua ou manatu ai e tatau ona toe faapupula vaega ia ina ia nofo malamalama le Palemene leni i matafaioi o lo o tauave e tatou Ofisa o Tofiga faale-Faavae, o latou ia e leoa le tatou atunuu ma le Malo i tulaga o le Tulafono. Ma e faapenei le vaai mai a atunuu i fafo ia Samoa, pe faapefea le tausia o le paiaaga o le ola i le Tulafono o tatou tagata. Ma o auala foi na, o le isi auala taua lea o lea o lo o lilifa mai ai fesoasoani a Malo mai fafo, ona o lo o latou iloa o lea o lo o mautu le tulaga o le paiaaga o le ola o le Tulafono o le tatou atunuu.

Lau Afioga i le Fofoga Fetalai, e i ai mataupu na aumai i le tatou Minisita o lo o nafa ma tatou faatoaga ma faigafaiva. O le mataupu taua tele ua ou fia taua o le fugafuga. O le a le tulaga o i ai fugafuga, o mamao ma mea uma lava pei e foliga tasi, ma maisu, ae tasi lava le tauga faigofie o fugafuga. O le tulaga lea e i ai le lalolagi ma outou uma ua mafai ona malaga atu i Asia po o Thailand ma outou savalivali e matamata i le tele o faleoloa. O faleoloa e faatauina ai oloa eseese, ona outou matauina ai lea, le matua tele o fugafuga ma maisu e faatau, ona e i ai lava le ituaiga kuka e kuka ai mea ia, ma e taugata. E tatala loa faasoloatoa le fugafuga e le atoa le ono masina, ae leai se mea e toe maua i totonu o ogasami o Samoa. O le ala lena o lea e faafaigata ai ma puipui e le tatou Matagaluega e taofia le faatau faasoloatoa o mea nei e ave i fafo. Tuu pea a tatou mamao ma a tatou fugafuga e ola ai i latou o lo o ola pea i leni foi figota ae o le mataiai foi lea a Samoa. Na ou vaai i le sauai, o le isi ituaiga fugafuga lena masalo e maua le lua futu le umi ma le lapoa, masalo e uma le vaiaso o faasolo e se aiga, na maua mai i le faiva o lou tina. Sa fagota i Tuialamu, ae o la ou te laititi po o le fa o ou tausaga. Ua ou le toe vaai i se sauai, ae sili atu ona malu le sauai i le tausami.

Sa ou alu i le 1984 i le atunuu lea o Vanuatu, ma ou aumaulu ai i le latou gataifale ma ou matauina ai le anoano o sauai na e maua ai i ina. Na ou faatonuina ai lea o lau Minisita i le Paeaiga o le 2001-2006 le Minisita sa gafa ma le tatou Ofisa o Faatoaga. Alu e faafesootai Vanuatu, aumai ni tatou sauai e cultivate i inei, sa faapena foi ona ou faatonuina isi Minisita e o i Fiti, aumai le mamoe la na ou faalogo i ai e maua i Fiti e aumai i Samoa, ina ia mafai ai ona maua ni mamoe aua le fofoga taumafa o Samoa. Ae peitai ane na logoina au e le Minisita o la e tele sauai i lotoloto i gatai o Aleipata. O le mea foi lena o lea sa ou talanoa ai, i le Matagaluega e vaai figota ia, puipui figota ia mo tatou tagata nei ma e lu . A tatou le mataala i mea ia, e tele auala e faasola ai i fafo, o lea foi na maua na ave e isi faaauuala atu i vaalele, la foi la ua faatonu le Quarantine i le malaevaalele, sue lelei mea ia e ave nana i fafo. Aua o le tagata ia e soifua e pau lava lea o le mea e manao i ai o tupe, ae le o vaai i le lumanai. O le Malo lea e i ai le vaai mamao, e taofiofi mea nei mo le fofoga taumafa o lo tatou atunuu. E le atoa le masina e tatala ai mea nei ae uma. Lele ua le toe vaai se isi i se ofu gau, le toe vaai se isi i se safole, ae sa tele i gatai o Mulinuu sa masani ona ou fagota ai, i aso ia ao ou nofo i Saleufi. Ua le toe maua mea ia, aisea? Leaga o le tagata lava ia o lona natura e manatu faapito, ao le Malo o lo o i ai le vaai mamao e puipui mea ia mo le tatou soifua, agai atu i le lumanai. O le tala lena i fugafuga.

O le tulaga i pole lea ua i ai le fuafuaga a le Matagaluega, e fausia ni pole, pole ia e ave e faatafetafea, taula lelei i gataifale. E ao foi ona faautauta le faaaogaina o mea nei, e i ai.....ou te le iloa po o a ituaiga maea ia e tataui i i lalo ona ola ai lea.....le iloa po o ni limu, ona o atu lea o tamai ia aai ai, o atu ia feololo aai ai, o atu loa ia lapopoa aai ai, ia la na o lea e o atu tatou pue mai. O lea la ua i ai le plan a le Matagaluega, e fau mea na o pole, latou o lo o manao i pole, e lelei ona o ane pea e faatalanoa ma tusi outou igoa, popo koko. O le talosaga e fia maua ni koko ma ni popo toto, o le mea o le koko ma le popo lea e faatau i le maketi. O le a faalagolago mai lava i lenei Matagaluega ae o le anoano o le koko lea e faatau i le maketi. E na ona e alu ane lava e faatau lau ato koko e tasi, e te fiu e toto. Na ou sau foi faatau ai au koko, ao lou faatalitali i le tatou package lea stimulus package o lona uiga ai foi o faapena le Matagaluega ia. Matua e ola faalagolago tele, alu ane oe e taetae atu popo la e i lalo o niu e toto, ao le mea lea e tataui ona fai e Matagaluega, ua tataui ona fai se ponesi. Ua leva ona ou pesepese ai i le Matagaluega, fai se ponesi, tusa lava pe na o se \$10 i le niu ua lava le sefulu niu e toto. A mafai.....o lea na tatou faalogologo e luasefulu lua afe ea aiga. Afai e toto le sefulu lena, ona maua ai lea o le luaselau luasefulu niu, ae e le tele se tupe e alu ai. Ae totogi lava le ponesi i tausaga uma, ina ia.....leaga o isi ia uiga o tatou faifaatoaga, a leai se ponesi, e le alu e vaai ia niu, e pei o le tatou masani lava lea.

O lea foi e faatalanoa le tulaga e uunai le tatou small scale farmers, ituaiga faatoaga foi lele na o le toeaina lava ma lona atalii. O le a la le mea e mafaia e le toeaina ma lona atalii e na o se lua eka pau lava lena o le mea e mafai. Ona o lea ua faatulafonoina, a e alu loa e hire mai tagata faigaluega e totogi tupe o le latou wage, ma ia mataitu le minimum wage lea e pese ai le toatele o outou ua tataui ona tasii ae afaina ai le au faifaatoaga. O le ala lena e ala ai ona matua faaeteete le Malo, i le faatulagaga o totogi ia mo le au labour. Ona e vaai totoa foi i le aafia o le au faifaatoaga. Manu ainiu o lo o lelei pea le faagasologa o le tatou polokalame lea, o lea foi e faasau i le televise. A o le fautuaga o tatou lava, talanoa ma o tatou sui o le Malo, ma tuualalo i ai, toaaga alii e o e tape le

manu ainiu o lena foi ua avatu ia ili afi, e uma ane foi ua ili ai fafie ae le ili ai laau e avane e susunu lea e tuufua ai le manu ainiu.

O le polokalame lea o le stimulus package ua leva ona fai, ma ua tataua ona faaaauu pea, ma taumafai foi o lea e faafogafoga mai lau susuga i le Ofisa Sili, tilotilo tonu, e le tele se tupe alu i le mea lea o le totoina o niu pe afai e na o le \$10 e ave i le niu. Afai e toto le sefulu, o lena \$100 e matua fiafia le toeaina e uunai ai e alu e teuteu ana niu, ona o le tulaga masani o tatou, na ona toto lava o le niu le toe alu e vaai seiloga lava o le a fua ona faatoa alu lea e vaai. Ae o le uunai i le \$10 e ono alu ai e teuteu.

Lau Afioga i le Fofoga Fetalai, ua leai se isi mea o totoe. Ou te talosagaina tatou agai loa i nai minute ia e totoe ou te iloa lava e ta le 1:00 ua uma la tatou paketi, pe a le faalavelave soo nisi e tuai ai a tatou galuega. O le lafo faatu lena lau Afioga.

FOFOGA FETALAI: Malo faafetai, ua manino le faafogoga a le atunuu aemaise o le Palemene i le saunoaga manino a le Palemia, ua maea ona tali foi le Malo i mea sa laga e sui mamalu ia latou saunoaga, i le tulaga tau tupe ma le tamaoaiga o Samoa ma faiga faavae tau tupe a le Malo. Ma ua maea foi ona faatu le lafo ma faapea foi ona faaluaina mo le faitauga faalua o le Tulafono Tau Faaofi. O lea o le a tuuina atu loa le fesili.

Na tuuina atu le Fesili ma faamaonia ai le lafo na faatuina i le aso 28 Me 2019, ma faitau faalua ai le Tulafono Tau Faaofi o le Faatatauina o Tupe Faaopoopo (Nu.2) 2018/2019 ma le Tulafono Tau Faaofi o le Faatatauina o Tupe 2019/2020.

FOFOGA FETALAI: O le a sagai atu loa le Fono Aoaio i le Iloiloga Auiliili o le Tulafono Tau Faaofi o le Faatatauina o Tupe Faaopoopo (Nu 2) 2018/2019.

I le faagasologa o le Iloiloga Auiliili o le Tulafono Tau Faaofi, e mafai ona saunoa faatepa sui usufono i mataupu o lo o tusia i le pepa 2019/2020 Nu 21, Tala Faatatau Faaopoopo (Nu 2) o tupe maua ma tupe totogi a le Malo o Samoa mo le tausaga faaiiina aso 30 Iuni 2019 atoa ai ma le Pepa 2019/2020 Nu 72, Lipoti a le Komiti o Tupe Maua ma Tupe Totogi a le Malo o Samoa mo le tausaga faaiiina aso 30 Iuni 2019.

E tusa ai ma Tulafono Tumau e 134, e amata le Iloiloga Auiliili o le Tulafono Tau Faaofi i ona Faamatalaga.

**FAAMATALAGA MUAMUA
VAEGATUPE MA TALA FAATATAU
FAAOPOPOGA I TUPE FAATATAUINA**

MATAGALUEGA ALU	FAAMATALAGA	AOFAI TUPE
----------------------------	--------------------	-------------------

OFISA O LE FONO AOAIO FAITULAFONO		\$40,000.
--	--	------------------

Faamaonia.

TUPE **\$4,500,000.**

Faamaonia.
SOIFUA MALOLOINA **\$3,000,000.**

Faamaonia.

AOFAI FAAOPOOPOGA I TUPE ALU AOA 2018/2019 **\$7,540,000.**

Faamaonia.

**FAAMATALAGA LONA LUA
FAAITITIGA I TUPE FAATATAUINA**

**MATAGALUEGA FAAMATALAGA FAAITITIGA I TUPE
ALU**

OFISA O LE FONO AOA Aofai o faaititiga Tupe Alu **\$40,000.**

Faamaonia

AOFAI FAAITITIGA AOA I TUPE ALU 2018/2019 **(\$40,000)**

Faamaonia.

FAAMATALAGA:

Faamaonia.

**FUAIPU 2: Faamatuu atu ma le Faatatauina o le \$7,540,000 mai le
Faaputugatupe a le Matagaluega o Tupe.**

Faamaonia.

**FUAIUPU 3: Faaititiga o aofaiga na uluai faatatauina ma toe faasoasoa
atu i isi galuega faatino ma galuega faatino laiti.**

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Faatatauina o Tupe Faaopoopo (Nu.2) 2018/2019.

Faamaonia.

Na faagasolo le Tulafono Tau Faaofi o le Faatatauina o Tupe Faaopoopo (Nu.2) 2018/2019 e aunoa ma se Teuteuga.

**TULAFONO TAU FAAOFI O LE FAATATAUINA O TUPE
FAAOPOOPO (NU.2) 2018/2019
– faitauga faatolu**

FOFOGA FETALAI: Ma lou faaaloalo ou te tapa le Minisita o Tupe.

Afioga Hon SILI EPA TUIOTI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau faaofi o le Faatatauina o Tupe Faaopoopo (Nu.2) 2018/2019 i lona faitauga faatolu.*

Faaluaina e le Minisita mo Aoga, Taaloga ma Aganuu.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.

**TULAFONO TAU FAAOFI O LE FAATATAUINA O TUPE 2019/2020
- iloiloga auiliili**

FOFOGA FETALAI: O le a sagai atu le Fono Aoao i le iloiloga auiliili o le Tulafono Tau Faaofi o le Faatatauina o Tupe 2019/2020 ma Tala Faatatau Autu o Tupe Maua ma Tupe Totogi a le Malo o Samoa mo le Tausaga Faaletupe Faaiiina aso 30 Iuni 2020 faapea le Lipoti a le Komiti o Tupe Maua ma Tupe Totogi i le Tala Faatatau Autu o Tupe Maua ma Tupe Totogi a le Malo o Samoa mo le Tausaga Faaletupe Faaiiina aso 30 Iuni 2020.

A o le i alo atu i le iloiloga o le Tulafono Tau Faaofi, ou te fia faailoa atu Faasaoga o le Lomiga Samoa i le Tala Faatatau Autu o Tupe 2019/2020. O ia faasaoga e aofia ai itulau 1, 13, 15, 36, 38, 40, 79, 102, 103, 141, 142, 144, 145, 198, 219. O lena ua tufatufaina atu i luga o a outou laulau.

E tusa ai ma le Tulafono Tumau 134, e amata le iloiloga auiliili o le Tulafono Tau Faaofi i lona Faamatalaga.

FAAMATALAGA

VAEGATUPE MA TALA FAATATAU

MATAGALUEGA:	TUPE ALU FAATATAUINA
FAATOAGA	\$18,566,801

Faamaonia.

PISINISI, ALAMANUIA & LEIPA:	\$19,852,036.
---------------------------------	---------------

Faamaonia.

FESOOTAIGA & FAAMATALAGA TEKONOLOSI:	\$7.644,638.
---	--------------

Tofa OLO FITI AFOA VAAI: Lau Afioga i le Fofoga Fetalai...

FOFOGA FETALAI: Se i tulai mai le sui usufono mo Salega Sasae.

Tofa OLO FITI AFOA VAAI: Faafetai lava mo le avanoa. Ou te fia tautala i le Galuega Faatino po o le Output 5. O le mataupu lea o lo o i lalo o le Matagaluega o Tupe, ae pei e sili ona ou fesili atu i le Afioga i le Minisita Lagolago ona o lea e le o i i... I le \$2.8miliona lea o lo o faaagaaga mo le DSHS o le Ash Cable ona o lea ua agiga foi ua amata ona faaaga le tatou Tui Cable, a o lea ou te tilotilo atu i i o lea lava e i ai le isi vaegatupe lea o lo o alu agai i le Ash Cable tuai lea na i ai.

O lona lua lau Afioga i le Fofoga Fetalai, o le tatou mea lea o le Call Centre po o le Data Centre lea ua faamanino mai e le tatou Matagaluega. O lou popolega i i lau Afioga i le Fofoga Fetalai, po ua i ai se Tulafono e puipuia ai datas ia po o information a le tatou atunuu, ona o lea foi e i le tulaga o le kamupani lea ua faataua le tatou Blue Sky, e tele a le latou share i ai i totonu i i. O lona uiga e pei e pule saoloto ai latou, ae tatou te manumanu i a tatou faamatalaga i le liki atu i tua.

O le isi vaega lau Afioga i le Fofoga Fetalai, o le mea lea ua faatulai mai o le Digital Transformation Authority, ou te le o mautinoa lau Afioga po o le a le mea o le a toe faatu ai le authority lea. Ae pei ona o lea e taua faapea o le suiga o le tekonoosi agai i le analog to digital, e pei o se mea lena o lea ou te tau matau atu. A o le upu moni lava lau Afioga i le Fofoga Fetalai, e le otometi ona sui e le masini le analog to digital, o le tagata faigaluega na te faia le galuega lea, o la e i ai tatou MCIT, o lo o agavaa lelei a tatou tagata faigaluega lea e la te tauavea matafaioi lea i lo le fai o se isi mea fou. O lona uiga e i ai le CEO, e i ai le staff, ia a o si tamai mea lava.

E pei o lou tulai atu lea ma le agaga faaaloalo lau Afioga i le Fofoga Fetalai e fia malamalama i vaega ia. Ma le faaaloalo.

FOFOGA FETALAI: Malo faafetai. Se i ou tapa le Taitaifono o le Komiti.

Afioga ALIIMALEMANU ALOFA TUUAU (Taitaifono o le Komiti o Tupe): Lau Afioga i le Fofoga Fetalai, ou te masalo e sese le vaega lea e vaai i ai le sui usufono mamalu. O le Lipoti a le Komiti o Tupe, o lea e talanoa ai i le faaitiitiga o tupe sa faatatauina i le tausaga na tea nei ma le tausaga lenei ona ua faaitiitia ua le o toe i ai se pili faaletausaga lea e taua ai le SNPH. O le uiga lena o le lipoti, e \$670,761 lea na i ai i le tausaga na tea nei, ua le o toe i ai sea vaegatupe i lenei tausaga, faaopoopo i ai ma le faaitiitia o pili a le CSL ma isi vaegatupe na o le initaneti lea e i ai le \$2.2miliona ua faaitiitia ai vaegatupe, ae le faapea o se vaegatupe faaopoopo.

Ua taua le Digital Transformation Authority, o se fuafuaga alualumamao lea a le Matagaluega ona ua tele ituaiga systems faa-computers lea ua i ai nei, o le agaga lea ia i ai se vaega foi lea latou te faatonutonuina atu le faaaogaina o le tele o tatou fesuaiga ia o auunaga faatekonolosi, ona o le tele o polokalame faatekonolosi eseese o lo o faaaogaina e Matagaluega eseese, ma o le manatu lea o le Matagaluega, o se fuafuaga ina ia talafeagai ma fesootai le faaaogaina lelei o nei polokalame faatekonolosi ua faaaluina ai le tele o tupe. Ma le faaaloalo lava lau Afioga i le Fofoga Fetalai.

Tofa OLO FITI AFOA VAAI: Lau Afioga i le Fofoga Fetalai, e faamalulu atu i le Afioga i le Taitaifono, e le o sese le mea lea ou te fai atu ai. A silasila lau Afioga i le Taitaifono ma le mamalu o le Komiti i lalo o le vaega o le tupe totogi a le Ofisa o Tupe, o lo o manino mai ai le mea lea i le \$2.8miliona lea e faaagaaga mai. E le o i lalo o le Matagaluega o Tekonolosi, ae ona o le tupe o lea e faagaaga e le Ofisa o Tupe mo le Ash Cable lea e i lalo o le vaega o le Matagaluega o Tupe. O le ala lena o lou fesili atu, o lea e manino mai lava le \$2.8miliona.

FOFOGA FETALAI: Malo. Ua maua, se i toe tulai mai le Taitaifono.

Afioga ALIIMALEMANU ALOFA TUUAU: Lau Afioga i le Fofoga Fetalai se i oo atu ia i le Matagaluega o Tupe ona tali atu lea o lea tatou te i lalo o le Matagaluega o Fesootaiga ma Faamatalaga Faatekonolosi. Ae o lea e fesili le sui usufono i o i vaegatupe ia e i lalo o le Matagaluega o Tupe. Ma le faaaloalo.

FOFOGA FETALAI: Malo. Ia se i tulai mai le sui usufono mo Faleata Sisifo.

Tofa LEALAILEPULE RIMONI AIAFI (Faleata Sisifo): Lau Afioga i le Fofoga Fetalai, faafetai o lea ou te fesoasoani i ai i si ou uso. O le Ash Cable e eseese mamau a le Ash Cable ma le mea lea tatou te talanoa i ai, le NSPH lea e refer i ai le Afioga i le Taitaifono o le Komiti o Tupe. O le SNPH o le mea foi lele a le Malo lea la e i ai tupe ia ua sefe mai e ova ma le \$2miliona lea ua pau ai i lalo le tupe faaoga e le ofisa i le tausaga fou, lea ua sau mai le \$9miliona i le \$7miliona.

O le Ash Cable, o le mea foi lele sa sau ai tatou mai Tutuila, lea ua sui nei i le tatou Tui Cable, le Marine Cable, ua le toe faaaogaina la. E i ai nai mea o konekarate sa fai, lena e i ai nai tupe ia e le i totogia e faamalieina ai, lea e

taatia ai le tupe lea i lalo o le Ofisa o Tupe mo latou. A o mea lava tau MCIT lea tatou te talanoa ai, ua mama matou ma lea vaega.

O le mea lea e atugalua ai le sui usufono i tatou data foi nei e ono liki atu i tua, o lena na te silafia, e toe tali a ia i lana fesili, e faigofie lea vaega, o lena ua uma ona fai aiaiga e puipui ma leoleo ma taofi ai data mo le oo atu i ona aao ma faasalalau atu i fafo.

Tofa OLO FITI AFOA VAAI: Lau Afioga i le Fofoga Fetalai, ua atili ai ona sese le mea i le tulai mai o le Minisita Lagolago.

FOFOGA FETALAI: Malo. Se i tulai mai lava le Afioga i le Palemia.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, na ona ou tulai atu a e faamaonia mea ia na saunoa i ai le Minisita Lagolago, faapea foi le Taitaifono, a o lea ua uma avanoa o le sui usufono lea e tu soo mai ma faalavelave.

FOFOGA FETALAI: Malo. Ia ua maea avanoa e lua o le sui usufono. Ma ia aua ne i galo ia outou, e tusa lava pe le o i i le Minisita autu, a o le Minisita Lagolago o le matua steady lava i taimi uma. Malo faafetai.

Faamaonia le vaegatupe e \$7.644,638 mo Fesootaiga ma Faamatalaga Tekonolosi.

AOGA, TAALOGA & AGANUU **\$109,517,345.**

Faamaonia.

TUPE: **\$98,461,552.**

Faamaonia.

**MATAUPU TAU LE
VA I FAFO MA
FEFAATAUAIGA** **\$23,634,753**

Faamaonia.

SOIFUA MALOLOINA **\$112,081,674**

Faamaonia.

**FAAMASINOVA &
PULEGA TAU
FAAMASINOVA**

\$13,126,656

Faamaonia

**PUNAOA
FAALENATURA
MA SIOSIOMAGA**

\$25,284,132

FOFOGA FETALAI: O lo o i ai le faasaoga a le Komiti i le Matagaluega o Punaoa Faalenatura ma le Siosiomaga e pei ona faaalua i le Pepa Faaopoopo o Galuega. Tulai mai le Taitaifono o le Komiti.

Afioga ALIIMALEMANU ALOFA TUUAU: Lau Afioga i le Fofoga Fetalai, ou te faatu le faasaoga i le Matagaluega e faapea:

“FAASAOGA:

Ia aveese le aofai e \$600,000 o lo o faatatauina mo le Tau mo Elele a le SNPF i le Tala o le Tupe 2019/2020, ona ua maea ona tofogi lea fanua i le NPF mo le faaaogaina mo Faasao a le Matagaluega, ia ma suia ai le Aofai o Tupe Alu Faatatauina a le Matagaluega i le \$24,684,132.

Faamaonia le Faasaoga.

Faamaonia le Vaegatupe e \$24,684,132 mo Punaoa Faalenatura ma le Siosiomaga.

LEOLEO:

\$32,875,886

Tofa OLO FITI AFOA VAAI: Lau Afioga i le Fofoga Fetalai.

FOFOGA FETALAI; Ia se i tuu atu lava i le avanoa i le sui usufono o Salega i Sasae.

Tofa OLO FITI AFOA VAAI: O le fesili lava i le faiga faavae lea... Lau Afioga i le Fofoga Fetalai, na ona fia fesili atu lava i le Afioga i le Palemia po o le Minisita foi mo Leoleo. I le faiga lea e fai ai la tatou Holding Cells lea i Apia. O le popolega lea e tau tilotilo atu i ai, o le taimi lava e charge ai se tagata, ona sao loa lea i totonu o le falepuipui, ae le se holding cell. Manatua foi la lau Afioga i le Fofoga Fetalai ua uma ona declare e le Minisita o Falepuipui, o le Falepuipui le mea la e i tai e le o se holding cell. O lona uiga

la o lea e lua ia tatou falepuipui. O le popolega lau Afioga i le Fofoga Fetalai, ina ne i i ai ni mataupu faaletulafono e aliali mai i nisi e charge e leoleo ma tofu i totonu i i. Ia e pei o lou lena fia fesili fiamalamalama i lau Afioga.

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai...

FOFOGA FETALAI: Malie le sui usufono se i tulai mai le Palemia.

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI: O mataupu faapenei ua uma ona clear ma le tatou Ofisa o le Loia Sili, e faatatau i le aloaia faaletulafono o tulaga ia e laga e le sui usufono. Se leai lava se mea e te popole ai.

Faamaonia le Vaegatupe e \$32,875,886 mo Leoleo.

PALEMIA: **\$8,509,056**

Faamaonia.

TUPE MAUA: **\$12,468,924**

Tofa OLO FITI AFOA VAAI: Lau Afioga i le Fofoga Fetalai....

FOFOGA FETALAI: Tulai mai le sui usufono.

Tofa OLO FITI AFOA VAAI: Ia o le galuega faatino lua lau Afioga i le Fofoga Fetalai... Lau Afioga i le Fofoga Fetalai a matau atu i faiga faavae ia, matau atu i le crime rate lea ua oo i ai i le taimi lenei, ua fai sina saosaoa. E le gata la i le tatou atunuu, ia aemaise lava i tatou atunuu tuaoi. I lau la tilotilo i ai o se mea e ao ona matua ave i ai le faamamafa a le tatou Matagaluega, i le tulaga o le puipuia lea o tatou borders. Ia o lea lau Afioga i le Minisita o lea ua manaia ua ou faalogologo atu po o le isi lua tausaga po o se tausaga foi faatoa oo mai ia le tatou scanner foi lea mo mea o oloa lapopoa.

Ao le isi ou concern lea e i ai, e tele o taimi ou te sau ai mai Niu Sila, e leai ia se tatou taifau sosogi o iai, ia lea foi la na ou faalogo atu ua apaapa i a tatou taifau ropoti foi ia e aumai mai Saina, po o robot dogs, ia ou te fautuaina lau Afioga e manaia lava ia le aumai pea ae tuu au ropoti na ou te iloa lava e sue atu ua ou mai i se fale o se aiga i au mea na.

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai...

FOFOGA FETALAI: Tulai mai lau Afioga i le Palemia.

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI: O mataupu uma lava ia ua uma ona tagofia e le Malo mo fuafuaga alualu i luma e le... o lea ua faatuina foi ia le tatou Komiti foi lea vaia ia le tulaga lea faatuaoi. E tau mai foi Tutuila o lea ua i ai vaalele e lea faatasi ai ma vaatele ia ua faamoemoe e taunuu mai i nei i le masina o Aukuso. E leai se mea e popole ai o lea ua uma ona silasila totoa i ai ia le Malo i mea ia e laga mai e le sui usufono.

FOFOGA FETALAI: Malo, ia ua manino ia lea vaiiliu.

Faamaonia le Vaegatupe e \$12,468,924 mo Tupe Maua.

TINA MA TAMAITAI ATINAE O NUU MA AFIOAGA MA AGAFESOOTAI	\$10,047,442
--	---------------------

Faamaonia.

GALUEGA, FELAUAIIGA & ATINAE ESEESE	\$47,067,483
--	---------------------

Faamaonia

FOFOGA FETALAI: Lau Afioga i le Palemia ona o lea ua tatou taunuu i le tatou taimi, ou te tapa mo se lafo.

LAFO MO LE FAAAUAUINA O ITULA FONO

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, o lea ua matau atu toe afa inisi lava le tatou galuega ona uma lea. Ou te faatu atu ai ia se lafo, *E toe faaauau tatou Taulumaga o le aoauli nei seia pasia le Tala Autu o le Tupe 2019/2020.*

Faaluaina e le Sui Palemia, Minisita mo Pisinisi Alamanuia ma Leipa ma le Minisita mo Tina ma Tamaitai, Atinae o Nuu ma Afioga ma Agafesootai.

FOFOGA FETALAI: O le a faaauau ia le tatou galuega sei oo ina pasia le tatou Tala i le Tupe ona tatou malolo ai lea.

Na faamaonia le lafo.

**OFISA O LE
LOIA SILI** **\$5,305,858**

Faamaonia

**PULE MA
SUETUSI SILI** **\$3,913,650**

Faamaonia

**KOMESINA O
FAIGA PALOTA** **\$5,965, 518**

Faamaonia

**FONO AOA
FAITULAFONO** **\$6,528,556**

Faamaonia

**KOMESINA O
SULUFAIGA** **\$1,206,828**

Faamaonia

**KOMISI A LE
AUFALUEGA O
GALUEGA A LE MALO** **\$4,990,897**

Faamaonia.

GALUEGA TAU ALAMANUIA **\$2,712,306**

MA ATINAE A LE MALO

Faamaonia.

**OFISA O FUAINUMERA
FAAMAUINA: \$5,376,376**

Faamaonia.

**KOMISI O LE TOEFUATAIGA
O TULAFONO A SAMOA \$1,478,629**

Faamaonia.

**AUAUNAGA TAU FALEPUIPUI
MA LE TOEFUATAIGA \$7,098,552**

Faamaonia.

**AOFAI O TUPE ALU AOA O FAATATAUINA A
MATAGALUEGA
2019/2020 \$583,715,543**

FOFOGA FETALAI: O lo o i ai le Faasaoga a le Komiti i le Aofai o Tupe Alu Aoa Faatatauina a Matagaluega 2019/2020. Tulai mai le Taitaifono.

Afioga ALIIMALEMANU ALOFA TUUAU: Lau Afioga i le Fofoga Fetalai, talu ai ona ua faaitiitia le Aofai o Tupe Alu Aoa a le Matagaluega o Punaoa Faanatura ma le Siosiomaga i le \$600,000 o lea ou te faatu ai le Faasaoga i le Aofai o Tupe Alu Aoa mai le \$583,715,543 i le \$583,115,543.

Faamaonia le Faasaoga.

Faamaonia le Vaegatupe e \$583,115,543 e pei ona Faasaoina.

FUAIUPU 2: Faamatuu atu ma le Faatatauina o le \$583,715,543 mai le Faaputugatupe a le Matagaluega o Tupe.

FOFOGA FETALAI: O lo o i ai le Faasaoga a le Komiti i le Fuaiupu 2.

Tulai mai le Taitaifono.

Afioga ALIIMALEMANU ALOFA TUUAU: Lau Afioga i le Fofoga Fetalai, ou te faatu le Faasaoga i le fuaiupu 2 e faapea:

"FAASAOGA:

Ia aveese le fuainumera \$583,715,543 ma suia i le fuainumera \$583,115,543 ma faitauina ai le Fuaiupu 2 e faapea:

Faamatuu atu ma le Faatatauina o le \$583,115,543 mai le Faaputugatupe a le Matagaluega o Tupe.

Faamaonia le Faasaoga.

Faamaonia le Fuaiupu 2 e pei ona Faasaoina.

FUAIUPU 3: Faamatuu atu ma le Faatatauina o le \$490,333 mai le Teugatupe a le Tausi Mavaega a le Malo.

Faamaonia.

FUAIUPU 4: Faamatuu atu ma le Faatatauina o le \$17,511,466 mai le Faaputugatupe a le Matagaluega o Tupe.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le Amataga.

IGOA: Faatatauina o Tupe 2019/2020.

Faamaonia.

Na faagasolo le Tulafono Tau Faaofi o le Faatatauina o Tupe 2019/2020 faatasi ma Faasaoga.

TULAFONO TAU FAAOFI O LE FAATATAUINA O TUPE 2019/2020 - faitauga faatolu

FOFOGA FETALAI: Ou te tapa ma le faaaloalo lau Afioga i le Minisita o Tupe.

Afioga Hon SILI EPA TUIOTI: Faafetai i lau Afioga i le Fofoga Fetalai, a o le i faatu atu le lafo e muamua ona momoli atu le faamalo ma le faafetai tele i lau Afioga i le faafoeina o le Fonotaga e talanoaina le Tala o le Tupe, faapea foi sui usufono mamalu uma o le Palemene, aemaise foi ia le Taitaifono ma le mamalu o le Komiti o Tupe ona o le tapenaina ma le faaleleia atili o le tatou Tala o le Tupe.

A o le taimi nei lau Afioga, ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe 2019/2020 i lona faitauga faatolu.*

Faahuaina e le Minisita mo Aoga Taaloga ma Aganuu, Minisita mo Tupe Maua ma le Minisita mo Faamasinoga ma Pulega tau Faamasinoga.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaofaitulafono.

Na faaalua le agaga fiafia o le Palemene e ala i le patipati o latou aao ina ua pasia le Tulafono Tau Faaofi o le Faatatauina o Tupe 2019/2020.

FOFOGA FETALAI: Lau Afioga i le Palemia pe i ai sou finagalo pe o le a tolopo la tatou galuega mo le aso a taeao.

TOLOPOINA

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai o lena ua taoto le faafetai a le Afioga i le Minisita o Tupe, o le faafetai lava lea i le Kapeneta nei, ona o sao o a outou Afioga o le Maota nei, o lea foi ua faamauina le tele o outou finagalo faaalua.

O lea ua pasia le tatou Tala Autu o le Tupe, ia lafo mai laia e galulue le Kapeneta faapea foi i latou o Ofisa Sili o Matagaluega, e silasila totoa i fautuaga ma tuualalo na tuuina mai. O le a taumafai i ai i le

malosi e gata mai ai, e faatino ia le faatofalaiga o lo o ua faaalua i felafolafoaiga a lo tatou Maota nei.

O le matou toe faaopoopo atu lea, ae o lo o tele la tatou galuega o lo o totoe, o le a tatou faagasolo ai i le aso a taeao ma ona tala atu, seia maea lava ona pasia le tele o a tatou lipoti ma Tulafono ua i lumamea nei mo le faaiuga a le Palemene mo lona pasiaina.

Lau Afioga o le toe faaopoopo atu lea ua tataua ona fai se malologa, ua ta foi le taimi ua tataua ai ona tatou malolo.

FOFOGA FETALAI: Malo faafetai, ae tatou te le i tolopo o le a ou faaiuina la tatou Fonotaga i se tatalo.

Na tolopo Taulumaga a le Fono Aoaofaifuaifua i le itula e 1.07 i le afiafi seia aulia le itula e 9.00 i le taeao o le Aso Lulu, 26 Iuni 2019.